

光緒江西通志

江西通志卷一百五十八

列傳二十五

廣信府二

明

陳修字伯昂上饒人從太祖平浙東授理官援引律令
悉本寬厚盡改元季弊政擢兵部郎中遷濟南知府時
亂後比戶彫殘且多衛將練兵屯田其間修撫治有方
兵民相安洪武四年拜吏部尚書六部之設自洪武元
年鎮江滕毅首長吏部銓除考課諸法略具修偕侍郎
李仁詳考舊典參以時宜按地衝僻爲設官煩簡凡庶
司黜陟及課功覈實之法皆精心籌畫銓法秩然未幾
卒官

明史

白志昌案林志人
物志皆以修爲弋陽人

余德讓永豐人元季之亂德讓率義旅保障鄉邑明初

舉賢良歷官知池州時浙西初平命簡郎官有才猷者往參閫務德讓拜行省郎中區處安輯悉有條理以信州隸浙漕運不便詣闕陳其所宜遂改隸江西民深德之子英以人材舉同知力行惠政有父風

人物志

白天民鉛山人洪武初以明經任本邑訓導教人有方御史葉孟芳薦之曰學精德邁智慮過人才堪大用召至京師授廣東肇慶知府政績著聞

明一統志

張率字孟循貴溪人洪武初知嘉定州上海民錢鶴皋作亂入城據之率被執不屈囚繫松江獄先是朝廷命俞平章守太倉間嘉定失守遣兵來援會大軍平松江率得還俞素聞率賢曰幸公毋恙願聽約束不敢擾州民也民賴以安及罷任去老少皆爲之涕泣

人物志

何敏中貴溪人洪武以才行卓異任祁門知縣上書言時政得失朝廷嘉之遣行人賜以尊酒擢徽州府知府後轉嘉興府所至有政聲

明一統志

游志遜上饒人洪武間以蔭授廣西興安丞入朝應制賦詩擢御史舉劾不避權貴太祖稱爲忠直御史尋升

四川僉事

林志

葉瓚字贊玉貴溪人元金華月泉書院山長升婺源學正丁亥明太祖取婺州置行省中書召儒士許元等十一人入直省中講論經史敷陳治道而瓚首被選將大用之以病歸卒所著有石坡集孝經衍義廣信先賢傳子孝友以文學世其家

人物志

徐觀道上饒人洪武初以文學赴召試天地廟社山川

鬼神諸論稱旨授翰林院檢討署吏部考功郎中乞骸

陛辭上稱之曰善人有遺文若干卷藏家

人物志

李耕字原埜貴溪人以三禮舉進士授仁和令官八月

而卒性穎敏六歲能詩十歲通羣經金華朱景濂鄱陽

蔡淵仲皆稱之爲一代奇才弟造字原深以春秋舉進

士丞古田有宦績

人物志

吳從敬貴溪人博習經訓洪武初以薦授晉府長史所

著有康衢集小學訓義詩集大成古文孝經集義傳於

家

人物志

周彌瞻字景顏永豐人洪武初由明經授本縣教官尋

擢祠部郎嘗奉敕撰郊廟碑文未幾請老上重其學行

以清秩處之調國子學錄入爲王府教授終於官所著

有虛齋集

人物志

龔敦鈞山人洪武初以明經任府學教授御史葉孟芳

高其行薦至京師時建四輔官以四時爲號敦爲春官

未幾致仕復起國子司業尋升祭酒卒於官

明史安然林志

王自牧上饒人洪武間以人材用厯官至兵部職方司

郎中永樂三年從英國公張輔出征交趾卒於軍

人物志

楊廣仁上饒人永樂間任虔城縣令百廢具興雨暘應

禱嘗以累繫獄百姓相率詣闕白其冤得釋及卒老稚

遮迎其喪泣送者千百人

林志

俞孟芳字世賢永豐人幼爲葉氏後冒其姓明初以貢

入太學授東阿教諭升御史出按山東法紀嚴明墨吏

望風改轍旣按陝以言事謫鄭州倅尋復職嘗薦白天

民龔學行於朝帝嘉其所舉歷僉都御史卒

府志

王增祐字永吉貴溪人永樂進士授御史歷升副使嘗兩錄重囚辨死罪以下三百餘人進廣西按察使論奏總兵田真賊罪寘於法士官黃玠奪嫡殺本支七人增祐以聞收玠繫之獄玠度不可免潛結近侍以請易太子合景帝意卽命馳傳赴闕擢居督府增祐撫膺長歎曰所不能誅此逆賊復可與同立於朝乎遂解組歸

志

人物

裴德澤貴溪人永樂進士由庶吉士改授御史官寓不攜家服食簡約如寒素出巡福建風裁大著後以言事謫交趾居三年遂棄官歸

人物志

吳添麒字廷瑞弋陽人永樂進士官禮部嘗奉使東魯

閩楚諸大藩清聲昭著中外

明一統志

王受字謙益玉山人永樂鄉舉歷官監察御史升廣西僉事景泰初土賊韋萬秀攻掠慶遠受以兵破之尋致

政歸

林志

邱旭鑑貴溪人由吏材任通政司知事擢黃巖令累官至御史升浙江參政卒於官樞還縞素泣送者不下數百人復像祀之從子祺由鄉舉歷官處州知府

林志

江永洪貴溪人由茂才舉授監利丞天性廉介不以私干人人亦不敢干以私嘗以次往述職民恐遂代也爭遮留之居六年坐註誤引去人咸惋惜子憲孫左曾元

孫潮汝璧汝珪相繼起科第

人物志

石啟宗樂平人洪宣閒知歙縣有惠利民懷思不忘

明史

江正通志卷一百五十八 廣信府
貝秉彝傳

李奎字文耀弋陽人正統閒擢御史按浙江蘇松諸郡以楊士奇薦督京畿學政舉儒士黃輔等五十餘人分主師席士習丕變升大理寺丞遷右少卿未幾致仕歸所著有詩經辨疑九州集歸田錄子玘任御史升陝西

副使

林志

吳德祥弋陽人六歲喪父家貧比葬以衣裹小石周埋墳麓令異日可尋年十三值兵變隨母胡氏轉徙母卒哀毀幾絕

林志

胡濬鉛山人正統進士任刑部主事歷杭州知府公廉有威不畏強禦屬邑富陽新城屢旱濬相視開渠築隄引流灌漑滯獄悉爲剖決治行第一受璽書文綺之賚

人物志

黃溥字澄濟弋陽人正統進士擢御史厯任廣東四川按察使用法得平所著有石崖集漫興集所編輯者則有策學輯略治世正音詩學權輿諸書

林志

李柰字景春上饒人正統進士厯官吏禮二曹醇博知大體擢廣西參政協贊兩廣軍務韓雍平徭之役柰與有功焉

人物志

周福字慶鍾永豐人正統閒布衣也自幼警敏涉獵書史爲文操筆立就信守金銑會采英廟實錄辟福領其事兼預輯郡乘名重一時

人物志

呂晟字景熙永豐人景泰進士由庶吉士厯官夔州知府柔順和樂以孝行稱於鄉里有司上其事詔旌門

安志

白志舊案安志載有上饒章敬思王庭槐永豐呂賢俱以孝義稱爲附其名於此

高明字上達貴溪人幼事母以孝聞景泰進士授御史問內苑造龍舟上疏切諫徐州民訴有司於朝時例越訴者戍邊明言戍邊防誣訴也今訴不誣法止當杖民有爲妖言者吏貪功誣以謀反明按無反狀止坐妖言律皆報許巡按河南黜屬吏六十人入總諸道章奏御史趙銘等劾天下朝覲官觸上怒詰草疏主名明獨自承都御史寇深言頻年章疏盡出明手幸勿以細故加罪上意解石亨旣誅僮僕皆收明言不宜坐免者百人擢大理丞憲宗立拜南京僉都御史揚州鹽寇起守兵失利詔明討之造巨艦名曰籌亭往來江上督戰並江置邏堡候望賊蹤迹無所匿遂平之仍還原任以親老

乞終養歸上杭盜發詔起巡撫福建督兵往討禽誅首惡餘悉減死遣戍以上杭地接江西廣東盜易驅聚請

析置永定縣移疾歸久之卒

明史

鄭雅字仲平上饒人以監生調和鄉簿之官以一僕自隨每與令長部使者爭不便而頸時發赤繼判安節奏蠲逋稅病革戒僕飭後具無受賻歸裝一敝篋朝祭服外家訓十四條而已孫毅進士累官都御史以治行聞

林志

費璠鉛山人天性孝友事親養志親歿謹廟祭雖遇遠忌哀慕如初喪兄弟義居每食合諸房尊幼男女以類聚一人弗至不食也子宏宗既貴愈儉約自持常語子姪曰吾先世慈祥謙約以有今日汝能守此則慶祖永

延孝莫大焉鄉人有以關節通者懸束草於門謝之曰
某若開口行屬卽嚙此草終其身無私干章懋爲之傳
曰公之所立不出彝倫日用之常而各盡其所當爲真
足以爲訓也

安志

姚明字仲遠貴溪人景泰鄉薦

林志作成進士誤

選授御史按

東吳改巡兩浙平反冤獄無慮數十人擢陝西僉事督
甯肅軍餉舊法采銀限以一定明乃酌價之宜而上下
之士卒踴躍未幾以疾卒

人物志

婁諒字克貞上饒人少有志絕學聞吳與弼在臨川往
從之一日與弼治地召諒往視云學者須親細務諒素
豪邁由此折節雖埽除之事必身親之景泰鄉舉天順
末選爲成都訓導尋告歸閉門著書成日錄四十卷三

禮訂訛四十卷謂周禮皆天子之禮爲國禮儀禮皆公卿大夫士庶人之禮爲家禮以禮記爲二經之傳分附各篇如冠禮附冠義之類不可附各篇者各附一經之後不可附一經者總附二經之後其爲諸儒附會者以程子論黜之著春秋本意十二篇不採三傳事實言是非必待三傳而後明是春秋爲棄書矣其學以收放心爲居敬之門以何思何慮勿忘勿助爲居敬要旨後羅欽順謂其似禪學云

明史白志舊案吳康齋之門最著者陳石齋胡敬齋與婁一齋三人而已同時所見已不能無異同不待整菴方有貶辭也

李直字行裴貴溪人景泰進士歷官以廉能稱謝鞠明允時權貴門達假匿名書陷以法賴公論直之調興化判尋知保甯府列所宜行著爲令後移疾歸卒於道子

祚舉進士嘗建白時政皆切中事宜歷升僉事卒

人物志

邱鼎字宗周旭鑑子景泰進士累官右副都御史督漕運巡撫鳳陽風望肅然左遷副使備兵漢中尋起僉都御史莅巡撫事時漢中大旱便宜賑濟民賴以甯性剛介知止謝病章再上得允忻然曰吾嘗以不能勇退爲憾今日乃釋重負矣

人物志

劉伯川字東之永豐人天順進士逆璫曹吉祥怙奪門功橫甚每朝會故爲戲侮以市權糾儀者目攝之不敢言伯川舉笏披吉祥頰至流血朝儀肅然選額當授臺省郎當事者嫌其剛直抑除禹州知州有惠政卒於官

州人祀之

府志

王讓字謙光上饒人天順進士授給事中屢觸忌諱不

以禍福怵一時權貴深憚之里人懷忌相軋者因希風
旨嗾鵬兒誣奏出補濟南通判再擢楚雄知府黔國公
以下重其素望咸咨以邊務焉平生章疏最多燬不存
方擬大用以入覲過家而卒

白志

鄭節字從倫祺之子天順進士授南臺御史出按畿甸
以風裁稱憲廟初進所爲明良錄語頗觸諱賴優容得
賜還構草峯書院講學其中著禮傳八十卷續真西山
政經二卷發明朱子家禮作家禮略二卷

白志

江璞字伯溫貴溪人成化進士知南雄府器識英邁廢
墜畢舉嘗創大中書院修太平橋上疏創通濟鎮居停
客貨取資以代虛賦民蒙其惠祀於景德祠

廣東通志

楊縉貴溪人由舉人令歸化時山寇竊發邑無城民輒

逃竄緒請於上官爲築城鑿池民賴以安

福建通志

侯康遠字直夫弋陽人由薦舉授浙江建德令擢嘉興

府同知清儉以帥奢俗有某同知之謠尋請老歸卒

人物志

傅霖貴溪人由吏材任嘉善縣丞擢知東平州調濟甯

升保定知府爲政不畏權要惟以愛民爲心累著異績

被旌典受知楊士奇亟薦用之霖引疾歸

人物志

費瑄鉛山人成化進士官主事治水呂梁見上流有渠

舊合芻土沿渠築隄隄恆潰民苦征役乃募工改築石

隄西則立壩以殺湍悍之勢東則發長衝以通牽挽之

壅居民立廟祀之擢員外郎往按貴州爛土苗撫定之

劾巡撫謝景等罪遷貴州參議

明史費宏傳
林志

吳立字大本貴溪人由進士授刑部主事擢浙江僉事
所至鋤豪強植善良斥貪墨風采大著轉貴州副使飭
兵備屯田諸要害地越六載致仕

府志

畢瑜字珍廷貴溪人成化進士選庶吉士歷官工刑二
曹以廷臣薦擢山東提學僉事文學操履推重於時子
濟川以春秋魁鄉會兩試仕終編修著有春秋會同正

蒙解諸書

林志

鄭祺字彥禧貴溪人以才德薦授壽光丞升潁上令擢
福建通判民苦積逋他官嚴刑不能辦祺以誠感率爭
先輸納尋謝事歸

人物志

江常字正倫貴溪人由太學生拜永興令永興有豪人
侵奪民田常廉得實爲追復之豪人因行賄當路厚誣

常常歎曰本欲抑強扶弱以行直道今若此直道不可行矣棄官歸嘉靖初推官鄧尙義表常遺愛祀之鄉賢尙義永興人時常去任蓋六十餘年矣

人物志 謹案唐制節度使觀

察使官屬皆有推官故稱之曰節推曰察推舊志以推官爲節推誤今改正

費宏字子充鉛山人甫冠舉成化進士第一授修撰宏治中遷左贊善進左諭德武宗立擢太常少卿預修孝宗實錄拜禮部侍郎進尙書帝耽於逸樂早朝日講俱廢宏請勤政務學納諫報聞命兼文淵閣大學士參預機務尋加太子太保武英殿大學士宸濠謀復護衛屯田輦白金巨萬徧賂朝貴錢甯及陸完主之中官持奏至閣宏極言不當予詔卒予之於是宸濠與甯合而恚宏甯數偵宏事無所得以御史余珊嘗劾宏弟棗不當

留翰林卽指爲宏罪中旨責陳狀宏乞休并命案致仕甯遣騎伺宏抵臨清焚其舟資裝盡燬宏歸杜門謝客宸濠復求與通宏謝絕之益怒會宏族人與邑奸人李鎮等訟宸濠陰令鎮賊宏鎮等遂作亂率眾攻費氏索宏不得執所與訟者支解之發宏先人冢毀其家宏愬於朝巡撫孫燧始遣兵勦滅宸濠敗言者爭請召宏世宗卽位卽家起宏加少保入輔政宏持重識大體明習國家故事與楊廷和蔣冕毛紀同心協贊及廷和等去位宏爲首輔委任甚至其於大禮不能強諫亦未嘗附離而是時席書張璁桂萼用事由卽署入翰林驟至詹事宏每示裁抑璁萼大怨遂毀宏於帝言宏納卽中陳九川所盜天方貢玉受尙書鄧璋賕謀起用并及其居

鄉事又因宏子懋良坐罪下吏攻之益力復錄前後劾疏上之不得請則力求罷詆宏尤切章數上宏亦連疏乞休致仕去璉遂以尙書大學士入直內閣開一歲萼亦入矣萼旣前死璉亦去位帝始追念宏再遣行人卽家起官自是眷遇益厚宏亦竭誠無隱承璉萼操切之後易以寬和朝士皆慕樂之未幾卒贈太保謚文憲宏三入內閣佐兩朝殆十年中遭讒構訖以功名終子懋賢進士兵部郎中從子懋中進士及第湖廣副使明史婁謙字克讓上饒人成化進士任御史嘗督南畿陝西學政以躬行實踐爲教士類風動時汪直新貴能禍福人謙絕不與之接直銜之使邏校伺察竟莫開升四川

左布政使卒

林志

楊福字伯昌上饒人由監生拜藍山丞鄰邑安仁衡山民獠錯居告訐視藍山滋甚歷數官不能平部使因奪其篆而以福署之既至不數月績用茂著將遷秩移疾歸子麒進士累官南工部尙書譽望推重於世

人物志

汪鳳字天瑞弋陽人成化進士歷刑部郎中出知漳州府會屬邑盜熾上官欲以叛聞鳳持不可卒以計禽之患去而民不擾擢貴州參政卒子僕虞部郎俊宗伯偉

吏部侍郎佃侍讀人以爲積善之報云

人物志

姜瑄

一作緒

字玉卿弋陽人成化進士由知縣擢南京御

史宏治初劾守備中官蔣琮與小民爭利假公事以適私情厥罪有十琮與大學士劉吉合逮瑄謫桂陽州判量移甯國同知遷慶遠知府討斬劇賊韋七旋韋萬妙

其黨糾眾數萬攻城瑄堅守檄民兵夾擊破走之東蘭諸州蠻悉歸侵地總督劉大夏薦爲右江兵備副使思恩知府岑濬逐田州知府岑猛瑄與都指揮金堂合諸路兵大破賊思恩平條二府形勢請改設流官比中土廷議從之遷河南按察使尋以疾歸卒於家

明史

姚文灝字秀夫明子成化進士授都水主事擢湖廣提學僉事嘗自謂吾無它過人惟毀譽不入請託不行賄賂不通而已官三載卒所著有學齋藁經說雜說中庸

本義

白

鄭蘭字夢齡弋陽人成化進士拜官工曹累升四川左布政使時劇寇野王剛作亂齡乃峙糗糧繕兵甲卒生禽之擢都御史巡撫河南振憲度察風俗禮賢愛民卓

然中州之望卒於官

休志

李鏡字文明弋陽人成化進士授刑部主事用薦知岳州府築辰陵磯洩水墾田民深德之名曰李公隄升河

南按察使轉浙江左布政使卒

懷麓堂集

葉元字本貞貴溪人由鄉貢累官知雲南府時廣西師宗州煽亂督帥簡任以往元申軍法倡勇敢直擣賊巢斬首數千級眾咸服曰老將不如也平生清苦勤事卒

於官

人物志

周鵬字雲翔玉山人成化進士官刑曹升山東僉事尋改汀漳兵備所在廉慎執法嘗平劇盜野王剛劉廷用等後以不屈權貴謝事歸

人物志

蔣澹字子川上饒人成化進士歷官兵曹出知福州府

境內大治郡有靈濟宮例遣中官歲易時衣靡費供億

以萬計湊奏請以有司行禮罷遣中官

府志

汪謝志撰字東之鳳之長子也成化進士授青州府推

官始莅郡或以年少易之視事數日連決疑獄眾皆駭

服三年召入工曹升郎中嘗監稅於杭督運於蜀視河

決於張秋所在著聲以病告卒於途

府志

詹璽字廷信貴溪人成化進士官部署轉遷藩臬三十

年敎歷五省所至以廉謹稱

人物志

方仁字行恕弋陽人成化進士官刑曹升湖廣僉事澧

州王府卒校持鈔貫強索市物襲弊已久有司莫敢問

仁捕得數十人悉發戍邊其害遂息

人物志

呂琛字景運永豐人成化間授嘉魚令改調新甯



夷苗負固不率逋官稅鉅萬琛至撫以恩信諸苗率服

輸稅後謝事歸

府志

周序字仲禮永豐人宏治進士歷禮兵二科給事中嘗疏正君德圖治化八事多見采納升太常寺丞卒於官

人物志

俞

一作余

昆字佑英永豐人銳意性命之學學者稱裕齋

先生由歲貢授福安丞嘗上疏辨晰儒禪之異著尙書擬講太極圖解皇明治化錄等書與吳與弼胡居仁婁諒相友善與弼號康齋居仁號敬齋諒號一齋故當時有湖東四齋之稱

人物志

潘潤字德夫永豐人師事婁諒謹佩其教終身出入準繩規矩李夢陽督學江右以人才爲問諸生僉舉潤夢

陽致禮欲見之時方居憂以衰服拜於門下終不肯見
夢陽歎其知禮潤常焚香靜坐時以所得者發爲吟咏

終成都教諭

明儒學案

吳學字原思玉山人有志濂洛關閩之學補庠生受知
於督學李夢陽嘗曰吳生程朱之流不可量也不幸早
卒所著有正義解井田圖擬古樂府諸藁

人物志

徐宏字希齋貴溪人家貧嗜學從胡居仁遊取朱子行
狀授之示以用功自小學近思錄始宏佩服訓言日錄
其言行以自考事母若兄備極孝敬而於克己爲義尤

汲汲焉

人物志

萬廉字庭介鉛山人宏治進士授大理寺評事擢廣西
僉事清慎弗渝歷宦十餘年無一錢尺帛爲子孫遺物

志

夏鼎字汝梅貴溪人宏治進士授嚴州府推官擢知臨清州中貴人有脅取民貨者約令市肆曰籍之以聞用是勢少戢居踰年政譽日起俄遘疾卒

府志

李雲字自石貴溪人宏治進士擢御史出巡蘇松常鎮所部肅然不敢犯尋謫泉州推官卒

府志

徐盈字子謙貴溪人宏治進士守嘉興時常熟濬白茆江檄發郡丁數萬盈持曰白茆水患於吾郡差緩驅吾民遠役何忍邪移文助費不就徵發巡鹽御史行郡輒撻亭竈勒報鹽丁里胥乘機虐民盈爭之御史曰此有往例盈曰例自公作亦自公止豈國憲邪獲止

浙江通志

陳善弋陽人宏治進士知安仁縣性清介嚴於泊盜境

內甯息燬淫祠嘗以編戶逃亡重役累民奏減十五里

爲七里民永懷之

湖廣通志

呂紳字天翰永豐人宏治進士授行人司升刑科給事中偕劉蒞等疏留閣臣劉健謝遷觸劉瑾怒杖於朝瀕死黜歸列姓名奸黨中瑾誅起雲南僉事終四川副使

明史劉蒞傳

林志

方崙字石山上饒人宏治進士授桐城知縣擢刑部主事以釋冤獄忤劉瑾意解官歸里

林志

汪俊字抑之弋陽人舉宏治六年會試第一授庶吉士進編修與修孝宗實錄以不附劉瑾焦芳調南京工部員外郎瑾芳敗召復原官累遷侍讀學士擢禮部右侍郎轉吏部左侍郎時議興獻王尊號與尙書喬宇毛澄

輩力爭澄引疾去代者羅欽順不至乃以俊爲禮部尙書是時獻王已加帝號矣主事桂萼復請稱皇考章下廷議俊集廷臣七十有三人上議曰儀禮傳爲人後者孰後後大宗也漢宣起民間猶嗣孝昭光武中興猶孝元孰謂入繼之主與爲人後者異也宋程頤曰名稱統緒所系若其無別斯亂大倫臣謹集諸章奏惟進士張璠主事霍韜給事中熊浹與萼議同其他八十餘疏二百五十餘人皆如臣等議議上留中而特旨召桂萼張璠席書於南京復命集議俊不得已乃請加皇字以全微稱議上復留中十餘日至三月朔乃詔禮官加稱興獻帝爲本生皇考恭穆獻皇帝擇日祭告郊廟頒詔天下而別諭建室奉先殿側恭祀獻皇俊等復力爭嚴

旨切責趣立廟益急俊等乃上議立廟大內有干正統
臣不敢奉詔請於安陸特建獻帝百世不遷之廟俟他
日襲封與王子孫世世獻饗陛下歲時遣官持節奉祀
亦足伸無窮至情矣帝命遵前旨再議俊遂抗疏乞休
帝怒允其去明倫大典成落職卒於家隆慶初贈少保
諡文莊俊行誼修潔立朝光明端介學宗洛閩學者稱

石潭先生

明史

汪偉字器之俊之弟由庶吉士授檢討與俊皆忤劉瑾
調南京禮部主事瑾誅復故官屢遷南京國子祭酒武
宗以巡幸至率諸生請幸學不從江彬矯旨取王硯偉
曰有秀才時故硯在可持去俊罷官之歲偉亦至吏部
右侍郎偕廷臣數爭大禮又伏闕力爭及席書張璁等

大議猶持前說不變轉官左侍郎爲陳洸劾罷卒於家

明史汪俊傳

徐泓字本深貴溪人宏治進士初授翰林檢討侍親王講讀因論選事被劾除名後以薦擢四川參政值松潘寇擾轉督糗糧不乏尋以疾終

人物志

鄭毅字立之上饒人宏治進士累官至四川巡撫擢兩淮總漕所在政聲赫奕爲當時名宦著作甚富燬於火僅存巖山詩集

人物志

江潮字天信貴溪人以鄉試第一登進士知壽州累官副都御史巡撫山西提督三關軍務會妖人李福達惑眾聚黨震動三河潮捕急詭名入京匿武定侯郭勛家因得流言宮闈上疑之時張璁新相與勛比乃阿上旨

下潮獄革職閒住隆慶初復職贈官

明史馬錄傳人物志

祝濬字仲源玉山人宏治進士累官刑部郎中武宗南巡上疏諫止杖幾死著有苦行集致仕居家卒之日無

以爲殮

人物志

李艾字子芳上饒人宏治進士選庶吉士授浙江道御史會土官岑某以罪逮獄厚賂諸權貴貰免艾廉得其情竟寘於法逆瑾怙勢率同列伏闕叩諫獲罪未幾丁

內艱歸

人物志

夏瑛字潤甫玉山人宏治鄉舉仕醴陵令時賊劉齊寇湖湘瑛設方略禦之闔境無虞用薦升廬州馬政通判與印馬御史不合遂引疾歸

府志

費霖字子和宏之弟正德進士選庶吉士授編修時逆

濠陰蓄異志謀復護衛宏在內閣持不可案娶同郡婁
姓女濠妃之妹也故有連濠屢以意屬案案外遜詞色
而實陰折之濠因是切齒賂中貴出內批勒其兄弟皆
致仕乃益毒敷於家門戶幾不保及濠叛案閒道走贛
州上書王守仁謂先定洪州以覆其巢穴扼上流以遏
其歸路則成禽矣後卒如其策濠敗後薦者頌言宏兄
弟守正被禍詔還原職入侍講筵預修武宗實錄成升
春坊贊善累官禮部尚書仍兼學士掌詹事府事太廟
成加太子少保數奉召入西內賜直廬加少保卒贈光

祿大夫諡文通

鈴山
堂集

紀鏞字大器永豐吏授福建漳浦縣丞正德丁丑南靖
寇發命選有才幹者勦之鏞以膽力見用與賊交戰斬

首數千級賊潰乘勝抵巢穴因遇害贈承事郎漳浦知

縣錄其子理

林志

丁洪字秀學鉛山人正德進士性行端介屢抗權貴歷

官汀杭二州守母老乞歸養卒年八十一著有閩山詩

集

人物志

汪佃字有之俊弟正德進士歷官翰林院充經筵講官

與兄同以議禮不合左遷松江同知尋告歸嘉靖乙未

大臣交章薦起官禮部郎中晉太常卿轉詹事府以疾

乞歸不允卒於邸所著有東麓遺藁七十卷

人物志

詹瀚

明史何孟春傳作潮川誤也

字汝約玉山人正德進士官刑部

主事武宗南巡瀚與從子行人軾諫阻被杖軾死杖下

而瀚得不死經紀其喪以歸嘉靖初起郎中抗疏爭大

禮再被杖直聲益震聞父疾求歸疏凡四上命未下輒行擢湖廣藩臬霍韜首薦之轉浙江左布政使拜都察院副都御史撫治鄖陽告病歸會漕河役興特召總理適妖賊猝起瀚訓練河夫俄頃禽之擢刑部侍郎瀚侍從兩朝敷歷中外幾四十年世宗賜清修直節執法之臣二扁以褒美之所著有比部集振美堂藁治河奏議

明史何遵傳

人物志

詹軾字敬之玉山人正德進士授行人開爽磊落善談論上將南巡軾抗疏極諫下獄廷杖死嘉靖初贈御史

遣官諭祭

明史何遵傳
林志

楊麒字仁甫上饒人正德進士歷官工部尚書積學能文隨事輒辦嘗建盧溝橋今往來者德之

府志
盧溝橋非始

於明代舊
志殆失辭

邱九仞字時進祺之孫正德進士授石首令召拜南給事中屢因災異條陳皆關國體切民生凡議鹽法議糧解議機兵議立循環簿等事皆於數十年後悉見施行人以賈誼方之

府志

吳道南字宗甫貴溪人正德舉人歷官兵部郎中世宗幸承天道南爲導嚴戢騎從所過吏民安堵擢山東副使緝海盜築海隄勤恤民隱以勞瘁卒

人物志

夏言字公謹貴溪人正德進士授行人擢兵科給事中世宗嗣位疏請視朝後御文華殿閱章疏召閣臣面決帝嘉納之請改後宮負郭莊田爲親蠶廠公桑園遷兵科都給事中調吏科當是時帝銳意禮文事以天地合

祀非禮欲分建二郊并日月而四言請分祀天地自是大蒙帝眷張孚敬頤指百寮無敢與抗者言獨不爲下益以強直厚自結於帝遂擢少詹事兼翰林學士掌院事四郊工成進禮部左侍郎踰月代李時爲本部尙書去諫官未浹歲拜六卿前此未有也帝制作禮樂多言所議閣臣李時翟鑾取充位帝每作詩輒賜言悉酬和勒石以進帝益喜數召見諮政事賜銀章一俾密封言事文曰學博才優初加太子太保進少傅遂兼武英殿大學士入參機務李時卒言爲首輔加少師特進光祿大夫上柱國明世人臣無有加上柱國者言所自擬也昭聖太后崩詔問太子服制言報疏有譌字帝切責言言謝罪且乞還家治疾特賜酒饌俾還私第俟後命言

雖在告閣事多取裁決及建大享殿命中官高忠監視言不進敕葉入直西苑諸臣帝皆令乘馬又賜香葉束髮巾用皮帛爲履言謂非人臣法服不受又獨乘腰輿帝積憾欲去言而嚴嵩因得閒之遂代言入閣未幾河套議起言故慷慨以經濟自許因陝西總督曾銑請復河套贊決之嵩揣知帝意力言河套不可復語侵言言大懼謝罪以尙書致仕會有蜚語聞禁中謂言去時怨謗嵩復代仇鸞草奏許言納銑金交關爲奸利遂下銑詔獄嵩與崔元陸炳謀坐銑交結近侍律斬遣官校逮言言抵通州聞銑所坐大驚墮車曰噫吾死矣再疏訟冤帝不省獄成竟棄市時年六十有七言豪邁有俊才與諸議禮貴人抗帝以爲不黨遇益厚然卒爲嵩所擠

言死嵩禍及天下久乃多惜言者隆慶初復官賜祭葬
諡文愍言始無子妾有身妻忌而嫁之生一子言死妻
逆之歸貌甚類言且得官矣忽病死言竟無後明史謝志舊
案陳伯容甘露園集論文愍傳云文愍得罪世以爲簡
傲不恭及其死也以爲主復套分宜妻非之非也坐獻
帝事耳初文愍以議南北郊議九廟稱旨自清瑣拔擢
議登政府及獻帝配天稱宗祠廟之議起天子以其章
示文愍冀文愍和之也文愍噤不敢出一語至使分宜
掠其美而定其議天子心銜之矣故不旋踵而有稽緩
救藥之詰有過差旋蒙譴責至於奪勛階追論帖追印記
削職勒令還家而皆非其所以得罪之由最後主會統
復套分宜含沙立斬曾統文愍相尾斬西市而亦非其
所以致死之由藏恨於彼飾怒於此耳何以知之天子
待他閭臣處他邊事不如是峻而峻繩文愍適在配天
諸議之後以此知之不爾雖文愍之簡倨分宜之中傷不入也

夏尙樸字敦夫永豐人正德進士授南京禮部主事歲
饑條上救荒數事再遷惠州知府投劾歸嘉靖初起山

東提學副使擢南京太僕少卿與魏校湛若水輩日相講習言官劾大學士桂萼語連尙樸吏部尙書方獻夫白其無私尋引疾歸早年師婁諒傳主敬之學常言纔提起便是天理纔放下便是人欲魏校亟稱之所著有中庸語東巖文集

明史婁諒傳

白志舊案夏尙樸學案作尙朴號東巖從婁一齋受康齋

之學王文成贈以詩有舍瑟春風之句東巖答曰孔門沂水春風景不出虞廷敬畏情蓋其學傳主敬故云爾

至謂心所以窮理未足以盡理與陽明心卽理也之旨顯然相背矣

李玘字孟玉山人正德進士授金華令有惠政章懋常稱之升工部主事轉刑部員外郎致仕歸家徒壁立有司欲一見而不可得

人物志

黃初字慎卿貴溪人正德進士及第授翰林院編修少穎敏博聞強記長乃志於理學其端緒得之吳與弼而

深造爲多

人物志

桂榮字君用上饒人以舉人歷官至監察御史按部四川摘發如神自旦至暮斷獄百宗立釋疑獄數十人一省以爲神善詩歌古文辭有詩刻行世

府志

汪俅字克敬貴溪人嘉靖進士授刑部主事遷汀州守擢閩憲副拜副都御史巡撫鄖陽除興山保康之賊立塹堡於沙子嶺收武弁私卒申禁例以抑中官之橫凡先後建白於汀有六議閩有六議楚有八議廣西有平徭疏卽有蠲租緩解疏皆於國計時艱稱碩畫云

人物志

畢竟立字惟中貴溪人嘉靖鄉舉知化州時逆賊張連輩僭號改元割據五省竟立從征計禽諸僞將蕭雪峯林胡曦徐東州等事聞受上賞由建甯同知轉升雷廉

僉憲尋以采珠忤當道歸人物

志

江以達字于順貴溪人嘉靖進士初授刑部主事典閩試遷閩督學僉事楚督學副使會章聖梓宮南祔顯陵三司出迎達居守以關防門禁爲楚藩所構逮繫詔獄廷杖削籍節義文章並推重於時著有平坡文集

人物志

徐九思字子慎貴溪人嘉靖鄉舉授句容知縣爲治於單赤務加恩而御豪猾特嚴訟者扶不過十諸所催科預爲之期逾期令里老逮之而已隸莫敢至鄉落縣東西通衢七十里九思節公費糞以石行旅便之朝廷數遣中貴醢神三茅山縣民苦供億九思搜故牒有鹽引金久貯於府者請以給賞民無所擾歲侵穀湧貴巡撫發倉穀使平價糶而償直於官九思曰彼糴者皆豪也

貧民雖平價不能糴乃以時價糴其半還直於官而以
餘穀煮粥食餓者穀多則使稱力分負以去其山谷遠
者則就旁富人穀而官爲償之全活甚眾久之與應天
府尹不合爲巡撫所劾吏部尙書熊浹知其賢特留之
積九載遷工部主事歷郎中治張秋河道漕河與鹽河
近而不相接漕水溢則泛濫爲田患九思議築減水橋
於沙灣俾二水相通漕河溢則有所洩以入海而不侵
田少則有所限而不至於涸工成遂爲永利時工部尙
書趙文華視師東南道河上九思不出迎遣一吏齎牒
往謁會遷高州知府文華歸修舊怨與吏部尙書吳鵬
合謀構之遂坐九思老致仕旬容民爲建祠茅山九思
家居二十二年年八十五卒

明史
白志

呂懷字汝德永豐人嘉靖進士選庶吉士受業湛若水之門邃於易遠近學者多宗之後改擢諫垣厯官國子司業太僕少卿致仕著有心統圖說傳於世學者稱巾

石先生

明儒學案

徐樾字子直貴溪人嘉靖進士聞良知之學豁然解悟初仕禮曹累官雲南布政使那江土酋那鑑反詐降樾以兵往奸臣李惟通賊洩謀被困死之詔贈光祿卿予

祭葬

明史王畿傳樾受業於泰州王艮學者稱波石先生

明儒學案

白志舊案徐

周法字直卿貴溪人幼岐嶷甫免於孩卽能口誦書史比長受尙書於里人黃簡繼受大戴禮於畢裕成諸生下帷益力四方士來學者日益親每一問難正襟危坐刺六經中語教愚導惑一一中肯窾非其人絕口不與

語信州士瞿然稱學府七赴省試不偶又不事生人產
事父竭心力父歿哀毀柴立母方在簷以哭幼兒故失
明法昕夕承歡歲時蔬果跪羞母母未嘗不敢入口母
卒法以未視含一語及輒淚下悲戀成疾竟不起以子

子明貴贈奉政大夫

郭青螺集

夏浚字惟明玉山人嘉靖進士授海鹽令厯官福建提
學副使尋轉溫處兵備時浙東海寇猖獗浚授方略鴟
渚平陽慶元金磐相繼奏捷廣右狼兵驕悍浚殲其渠
魁軍紀震肅擢廣西參政致仕歸

人物志

徐九經貴溪人嘉靖四十一年授政和縣丞壬戌倭寇

圍城與知縣周尙友堅守援絕城陷同死

福建通志

俞文明字信之永豐人嘉靖舉人令清流流賊窺城潛

從東門龍津入縣將過橋人民驚走文明挺身持矛禦之賊不敢進邑賴以全

人物志

周諒字惟貞永豐人嘉靖舉人知甯遠縣凡五載前官逋負完結者百三十有九事歲丙申大旱徒步拜禱雨隨澍又率鄉兵搗高山巢穴立五營以楹其險民賴之江華苗發奉委勦捕大吏獎異之後召補南京御史

湖廣志

通志

費元祿字無學鉛山人南太僕卿堯年之子家世貴顯元祿折節讀書爲歌詩落筆數千言蘊義生風傾慕賢士大夫如恐不及刻甲秀園集侑以好賄問遺海內名士輪蹄舟楫交錯吳會閩楚閒史稱鄭莊置驛殆無以

過

列朝詩傳

何天啟字義占貴溪人嘉靖舉人由諫垣謫丞遷令嘉善前此訟多停滯啟下車三日剖決無留勾攝不遺吏卒民無騷擾值歲潦力請蠲免

浙江通志

葉鏜字汝聲上饒人嘉靖進士授庶吉士改刑科給事中世宗朝言事稱旨命總理部事一時貴戚斂手尋擢南少司寇晉秩尚書致仕歸

府志

楊時喬字宜遷上饒人嘉靖進士除工部主事榷稅杭州令商人自署所入輸之有司無所預擢禮部員外郎遷南尚寶丞萬曆初以養親去起南太僕丞移疾歸時喬雅無意榮進再起再告闕十七年始薦起尚寶卿四遷南京太常卿疏請議建文帝諡祠祀死節諸臣就選通政使秩滿連章乞休不允召拜吏部左侍郎苞苴不

及門及大計京朝官首輔沈一貫欲庇其所私憚時喬方正將令兵部尙書蕭大亨主之次輔沈鯉不可而止時喬乃與都御史溫純力鋤政府私人若給事中錢夢皋御史張似渠于永清輩咸在察中又以年例出給事中鍾兆斗於外一貫大愠密言於帝特留夢皋已而盡留科道之被察者嚴旨責時喬等時喬奏辨請罷斥帝不問夢皋既留遂合兆斗累疏攻純并侵時喬及純去時喬歎曰主察者逐矣尙可覩顏與此乎九疏引疾竟不得請時中外缺官多不補而羣臣省親養病給假及建言註誤被譴者充滿林下卒不獲召時喬乃備列三百餘人三疏請錄用復列上遷謫鄒元標等九十六人削籍范儁等一百十人帝卒不省明年大計外吏時喬

堅辭不肯任有旨詰責乃再受事一貫已罷言路爭擊其黨而李廷機者一貫教習門生也閣臣闕眾多推之惟給事中曹于汴宋一韓御史陳宗契持不可時喬卒從眾議時帝委時喬銓柄又不置右侍郎一人獨理部事銓敘平允然中朝議論方囂動見掣肘時喬官位未崇又自溫純去久不置都御史無以鎮壓百僚由是上下相凌紀綱日紊言路得收其柄時喬亦多委蛇議者諒其苦心不甚咎也秉銓凡五年最後起故尚書孫丕揚未至而時喬卒篋餘一敝裘同列賻祿以殮詔贈吏

部尚書諡端潔

明史

徐易字希文永豐人嘉靖進士授鄞縣令開萬金湖築堰東西鄉凡三十二所瀦洩惟時閒募兵教水戰大儲

餉以養士卒亡何而海寇作人服其前識久之徵爲戶科給事中甫三月卒

人物志

費懋文字民煥鉛山人嘉靖舉人授臨武令捕巨盜息爭訟人士翕然歸化未幾致仕弟懋謙字民益襲廕官南京都察院經歷負詩名兼工山水梅竹青溪社集實爲首倡

府志

周守愚字汝哲永豐人嘉靖進士令當塗徵拜南京刑科給事中巡視京營劾論守備內監張宏泊兵部尙書王文擅停團營操不法事宏實與張居正表裏而文其姻婭也張銜之出守愚僉事福建尋摧浙東副使以疾告歸杜門十年卒

人物志

王建中字懋德上饒人生八月而父逝母毛氏課之讀

嘉靖甲辰領鄉薦知大理府抵郡卽察滇俗之陋有以同姓爲婚者首禁之尋入覲解組歸卒年八十五舉祀

鄉賢有集行世

人物志

裴化字子韞貴溪人嘉靖閒任華亭縣漆木鎮巡檢倭人寇化率兵禦死之華亭人像祀焉

府志

鄭邦福字洪疇上饒人隆慶進士任刑曹郎奉使卹楚囚補福建僉事遷粵東兵備時海氛方訖邦福至嚴斥堠謹偵邏備禦有方人倚爲重晉南太僕卿卒於道所著有采真遊藁

人物志

徐貞明字孺東九思子隆慶進士知浙江山陰縣敏而有惠徵爲工科給事中貶太平府知事累遷尙寶司丞初貞明上水利軍班二議謂陝西河南故渠廢堰在在

有之山東諸泉引之率可成田而畿輔諸郡或支河所經或澗泉自出皆足以資灌溉北人未習水利惟苦水害不知水害未除正由水利未興也今誠於上流疏渠濬溝引之灌田以殺水勢下流多開支河以泄橫流其淀之最下者留以潴水稍高者皆如南人築圩之制則水利興水患亦除矣其議軍班則言東南民素柔脆莫任遠戍今數千里勾軍離其骨肉而軍壯出於戶丁解出於里甲每軍不下百金而軍非土著志不久安輒賂衛官求歸衛官利其賂且可以圖餉也因而縱之是困東南之民而實無補於軍政也宜倣匠班例軍戶應出軍者歲徵其錢而召募土著以足之便事皆下所司又著潞水客談凡十有四利譚綸見而美之謂其說必

可行已而順天巡撫張國彥副使顧養謙行之薊州永平豐潤玉田皆有效乃進貞明少卿賜之敕令往會撫按諸臣勘議時御史蘇瓚方奉命巡關復獻治水墾田議帝並下貞明乃躬歷京東州縣相原隰度土宜周覽水泉條列事宜以上戶部尙書畢鏘等力贊之遂命貞明兼監察御史領墾田使有司撓者劾治貞明乃先詣永平募南人爲倡至明年二月已墾至三萬九千餘畝又徧歷諸河窮源竟委將大行疏濬而奄人勸戚之占閒田爲業者恐水田興而已失其利也爭言不便爲蜚語聞於帝帝惑之閣臣申時行等力言其利帝終不釋御史王之棟畿輔人也遂言水田必不可行乃諭令停役而欲追罪建議者用閣臣言而止貞明還故官尋乞

假歸十八年卒貞明識敏才練慨然有經世志京東水田實百世利事初興而卽爲浮議所撓論者惜之

明史

汪蘭字子芳玉山人宋汪應辰後由歲貢授開化訓導

致仕居家以節義自勵嘉靖辛酉廣兵袁三從浙駐玉

蘭窺其將作亂往賊營諭以禍福賊已嘯聚迫之行蘭

正色曰死卽死耳吾豈從若反乎罵不絕口被殺

人物志

徐伯鳳字國祥貴溪人生平學尊朱子而以小學近思

錄爲工夫讀書白鹿洞歸益精進每教人靜坐澄心以

觀清明之氣少時執母喪廬墓三年及司訓紹興聞父

訃跣行抵舍有雙鵲巢廬人以爲孝感所致

人物志

徐上達字孔學永豐人萬厯進士除嘉定令邑有豪右

爲民害上達下車卽剪抑之因爲所詆謫遂移難澤民

苦馬政上達條其弊力請上官剔除未幾憂歸起知藁

城復以狷直忤時左調叔白

二字疑姑仍之

喟然曰是官不薄

鮑明遠嘗爲之然吾木彊之性終不能易尋拂衣歸所

著有史記冰

謝志誤承

吹萬鳴編藏於家

府志

鄭以偉字子器上饒人萬厯進士授檢討典王子浙江

鄉試戊午再典江南試未幾典武場會試奉命冊封慧

妃陪琉球國使蔡堅俱如禮厯禮部左侍郎天啟四年

直講筵與璫忤上疏乞歸崇禎初召拜禮部尙書入閣

辦事上每召對平臺以劬瘁卒於官囊無餘貲贈太子

太保諡文恪所著有靈山藏集行於世

明史徐光啟傳四朝人物考

王夢暘字龍磯上饒人萬厯進士授安慶府推官時郡

有虎食人夢暘爲文禱於神三日虎自斃

府志

詹士龍字見五永豐人萬厯進士厯任漳泉海道不畏強禦斷還時相侵田相銜之命招撫海寇鄭芝龍聞者皆有難色卒奏績升山陝左右藩時逆璫魏忠賢祠祀徧天下士龍獨不爲建幾不免會璫敗晉南光祿卿授應天府尹尋謝政歸

人物志

夏子陽字鶴田玉山人萬厯進士擢兵科給事奉命冊封琉球升太常寺卿著有琉球錄所載山川風俗物產人民及所經屬國錯雜成文海國奇觀也

人物志

黃清上饒人起吏員以清勤積官嘉興同知加四品服俸築海塘有功後以運同治高寶河隄積勞死於寶應之甯國寺蓋上官忌之擠於水而以疾卒聞貧不能斂

朝廷贈恤有加

湧幢小品

葉際英字仲華貴溪人萬厯舉人仕邵武令復補四川
土寇煽亂與總兵楊某討平之升廣東雷州推官俗尙
奢侈率之以儉年老致仕士民遮道不忍舍

人物志

余桂萼字毓蟾萬厯舉人初爲彭澤縣教諭遷孝感知
縣廉惠有聲再遷巴州知州邑有寒士夏時亨者每夜
讀篝鐙達旦桂萼夜巡訪知其貧分俸助讀時亨後成
進士稱爲知人在任四年移疾歸

府志

徐久德字裕元上饒人萬厯舉人厯官至四川敘馬瀘
兵備副使值奢崇明亂變起倉卒焚掠甚慘久德百計
綢繆練兵措餉設閒招降凡五閱月所屬州縣俱平致
政歸年八十餘卒

人物志

方應瀚字養冲上饒人萬厯舉人遷隰州守轉山東濮

州先是妖賊王好賢徐鴻儒倡白蓮教餘孽禍山東濮
州爲甚應瀚至擇幹役密授以計雜賊中盡得其情乃
潛兵撲之前後俘八百餘人黨遂平未幾謝政歸

人物志

董繼周字八際玉山人萬厯進士授海豐令尋擢刑部
郎居南部十載遷鄖陽守有惠政秩滿解組還家著八

際山房詩文集金魚社彙行世

府志

詹兆恆字月如永豐人崇禎進士授甌甯知縣民居失
火延學宮兆恆奔煙燄中抱木主以出尋倡率重建徵
授南京御史十五年賊陷含山犯無爲兆恆疏劾總督
高斗光明年秋賊陷廬州陳內外合防策再劾斗光請
以史可法代斗光遂獲譴時江北民避亂盡走南京兆
恆慮賊謀闖入處之城外爲嚴保伍察非常奸宄無所

匿福王立擢大理寺丞馬士英薦阮大鍼令冠帶陞見
兆恆言先皇手定逆案芟刈羣兇十七年間第一美政
此輩日夕聚謀欲翻者數矣賴先皇神明獨斷堅持不
移今大仇未報忽召見大鍼還之冠帶豈不上傷先皇
之靈下短忠臣義士之氣哉疏奏命取逆案進覽兆恆
卽上進而士英亦以是日進三朝要典大鍼竟起用其
秋兆恆進本寺少卿卽請告歸唐王拜兵部左侍郎佐
黃道周協守廣信廣信破奔懷玉山聚眾自保尋攻衢
州之開化縣兵敗歿於陣

國朝賜諡忠烈

明史 白志 勝
朝殉節諸臣錄

崔賢弋陽人官直隸新河縣知縣崇禎十一年九月
大兵入塞下畿輔城四十有八新河亦失賢死之

江口北元卷三十一
廣信府
國朝賜諡節愍

縣志 勝朝 殉節諸臣錄

胡夢泰字友蠡鉛山人崇禎進士除奉化知縣邑人戴
澳官順天府丞怙勢不輸賦夢泰捕治其子其子走京
師愬澳令劾去夢泰澳念州民不當劾長吏而劫於其
子姑出一疏言天下不治由守令貪污以陰詆夢泰及
得旨令指實其子卽欲訐夢泰而澳念夢泰無可劾乃
以嘉興推官文德翼平遙知縣王凝命實之給事中沈
迅爲兩人訴枉發澳隱情澳下詔獄除名夢泰聲益起
吏部會廷臣舉天下賢能有司十人夢泰與焉行取入
都畿輔州縣殘破上欲得廉能治之諸行取者悉出補
夢泰得唐縣京師陷南歸唐王時授兵科給事中奉使
旋里丙戌城破夫婦俱縊死

國朝賜諡節愍

明史詹兆恆傳
勝朝殉節諸臣錄

鄭爾說字鼎殷上饒人崇禎進士知建甯縣考最擬補
臺班以屏迹權門得工部主事上章論首輔忤旨削職
騎驢出都門後首輔以罪歸用原官起補癸未請告還
里澹於進取假館於德興縣之南溪鄉爲童子師者積
二十年嘗遇盜劫衣笈將去密知爾說卽慙謝請死其
信孚強暴若此人物志

費曾謀鉛山人少師宏之裔由鄉舉官通許知縣崇禎
十四年闖賊猝至曾謀召父老曰我死若輩降可免屠
戮北向再拜抱印投井死

國朝賜諡節愍

明史劉振之傳
勝朝殉節諸臣錄

畢貞士貴溪人舉於鄉佐黃道周等守廣信城城破赴

水家人救之至五里橋望拜祖塋觸橋柱死

國朝入祀忠義祠

明史詹兆恆傳勝朝殉節諸臣錄

鐵銳永豐人兵至不屈死妻黃氏亦投城濠殉

國朝入祀忠義祠

勝朝殉節諸臣錄

潘肇華字嫺侯永豐人崇禎鄉舉以會試乙榜官知縣

乞歸土寇屢脅之不從避絕谷而終

縣志

江西通志卷一百五十九

列傳二十六

廣信府三

國朝

江天清字一元貴溪人以達五世孫順治會試副榜官南陽府推官冰檠自矢政聲卓然家世贍博問學該貫未久卒於官南陽民請入祀名宦

府志

王燭字炳若上饒人順治舉人南昌府學教授康熙戊午聘校湖北鄉試尋擢洪洞知縣俗尚奢侈燭手定婚喪讌會之禮八十二則名曰思深格言俗爲之變憂歸不復出

府志

徐旭齡字敬庵玉山人父一鴻挈之依舅氏於錢塘遂隸籍浙江順治進士官刑部主事累遷禮部郎中典試

江南擢御史嘗偕席特納巡視兩淮鹽政上疏言淮鹽積弊歷陳吏胥巧剝事凡三商情患苦凡六累數千言遷太常少卿歷轉左僉都御史上省官疏略言省事莫如省官自康熙十三年添道員者二十七今大患削平請裁撤歸併言多剴切出爲山東巡撫

聖祖南巡書清漪二字賜之以旌其潔旋授工部右侍郎遷漕運總督陳奏漕白二船貶五秩留任既卒復所貶秩

賜祭葬諡清獻

本傳府志

馮鏞字笙如永豐人順治進士授黎城令擢戶部主事性介直不受請託出榷蕪關通商裕課剔蠹除奸尋升員外郎再榷潯墅轉刑部郎中殫心勞瘁告歸卒

人物志

祝雷聲字震默上饒人順治鄉舉生平端方古朴不妄

交與澹於營利專以著述自娛康熙十三年閩變賊倡以僞職遁迹獲免年九十三無疾而終

人物志

花和仔弋陽人母姚氏爲賊所執奮擲求死賊抽刀欲殺之和仔前抱按其刃羣賊競砍之母子皆遇害

安志

鄭日奎字次公貴溪人順治進士

國史館清書庶吉士改官工部主事累遷禮部郎中出爲四川副考官使旋京察注上考

召對乾清門稱

旨特命纂修會典統理四司以勞卒日奎峻節清操倚重一時究心朝章典故旁及象緯兵農之學尤長於古今文賞爲漕揭洒洒數千言證據古今擘畫利害人謂視流民圖不啻過之

府志

潘大臺字望斗永豐人以明經任臨湘令時值湖南兵燹之後繼以凶荒里巷蕭條民居瓦礫大臺至葺城隍修學宮均田賦清驛遞適城中大火大臺泣禱願以身代須臾風返火滅回署漏盡遽得疾卒

安志

陳纁字絲言玉山人順治閒拔貢

廷試第一會方議停選就太學三課皆高等祭酒陳敷永學正范研經給事中朱裴等皆稱纁良史才交章薦修

明史

府志

王士高永豐人輕財好義爲鄉里推重順治初賊掠其鄉聞士高名誘之從不可縛之至西坑罵不絕以刃脅之不動重解其縛勸之士高益厲聲曰願刃我弗黨爾也投坑下觸石死

府志

桂天申字重禧上饒人順治閒歲貢生官定南訓導遷
吳縣丞以功擢雲南南甯知縣年老致仕歸天申有文
學經史多所論說

府志

張敬字敬夫永豐人明諸生康熙中曾薦舉博學鴻詞
父憂未赴與同郡鄭日奎胡夢泰爲文字交鄭胡皆下
之

府志

張時泰字開仲鉛山人順治閒貢生饒州訓導遷隴西
丞不赴篤志經學治尚書

縣志

范定國弋陽人明諸生才識閎博通緯書順治初土賊
肆掠定國與族人志俊贊明昌緒同邑諸生邵之榮同
日罵賊死

府志

葉春藻字出凡弋陽人諸生順治初寇氛未靖春藻躬

編保甲禦侮一方後爲土寇所執不屈死妻馮妾熊同
殉春藻無子有妾金氏撫夫兄子鼎爲後立私祠於縣
中喬山名四節堂鼎生父我辰母姚並殉難死著永思
錄紀其事

府志

鄭大賓字晉初玉山人明諸生順治初寇賊未靖津梁
不治大賓偶適所親方涉水賊劫少婦至令負之涉不
應將刃之歸而悔恨曰我豈爲賊役乎竟自經死

府志

紀伯雛字君一永豐人明崇禎鄉舉鼎革後足迹不入
城市布衣糲食以終老九仙之亂縣官欽其德望爲鄉
里所服踞請入山招撫以紓民患伯雛爲一行刀戟閒

開陳名義賊改容羅拜亂少戢

府志

方名世字盛臣弋陽人十歲喪母哀毀如成人遭父喪

蔬食三年志樂泉石不求仕進嘗構齋藏書其中日誦

經史嘉言懿行手自編錄

府志

陳大義貴溪人學問淹博不求聞達好陳說忠孝掀髯

慷慨娓娓忘倦年九十無衰容望之者歎爲神仙時同

縣徐邦治講貫經史亦甘肥遜絕不履城市

府志

吳起麟字振趾貴溪人明亡屏迹淇園購書植竹以終

老遺民多與之游

府志

璩自瑱字魯石貴溪人明選拔貢生鼎革後不求仕進

教授倪陽四方多負笈從之

府志

徐繼發字繩武貴溪人鼎革後構草堂馥蟾山下著書

講學不求仕進精天官家言嘗仰視列宿曰不久將有

寇變應在滇閩旣而吳三桂叛一時服其先見

府志

魯紹連字可泰貴溪人少習制舉屢試有司不得志棄

去學兵法僑寓山西順治戊戌成武進士尋授盱江中

軍紹連工詩學孟郊李賀有儒將風

府志

汪一作江蘭錫弋陽人諸生興甯令夢尹子父臥病不解

衣而侍願以身代事繼母如所生順治中避寇山居與

父相失遙得父耗病且革倉皇奔赴夜越險猝為賊傷

墮崖下二日而斃

府志

查懋夔字敬泉鉛山人大海裔孫居家孝友捐貲修葺

鵝湖書院邑人張時泰序其事年八十有七舉鄉飲大

賓子民敏隱居蕉溪推遺產讓諸兄弟孫繼尹貢生

白志

徐光藩弋陽人諸生避亂卜居晚溪鄉里以孝友稱兄

弟子姪約百口同居無異言

府志

鄭士謨字則文上饒人少穎異博淹羣籍通春秋杜門著述或爲書畫自娛自號沙潭散人同縣徐達有學行

隱迹著書士林並重之

府志

江樹德字子遜貫溪人副貢生官萍鄉教諭時稱經師升白水知縣未赴補略陽嘉陵江水暴漲壞城漂倉粟萬戶倉皇哭聲盈野樹德不俟報盡以餘粟賑饑已而悉核民田損千頃有奇發牒上陳勘災者多方詰難樹德力爭不少屈覆勘得實獲免賦二百六十餘金倉儲既虛限年賠補樹德遂落職留本任會母憂解官出居邸舍官逋繫牽不得歸略陽民感之納倉粟及額復建祠祀焉子砥有孝行以拔貢官教諭擢浙江湯溪知縣爲政有父風解組歸民繪忠孝仁義圖贈其行

府志

姜元春字伯昌興安人康熙鄉舉湖廣興山知縣時兵燹未靖哀鴻遍野元春安定還集規畫周摯報最入都總督董衛國餞之黃鶴樓江岸上下送別者數千人或流涕不能止董詢之皆言昔者寇盜剽掠年歲浹饑民炭炭不終日賴姜公安養是以不忘董亦爲之惻然入爲工部屯田主事值

陵工嚴急諸司無所措手元春抗疏請發帑自後四司皆先估

料沿例奏請官吏世受其德建祠署左祀之

府志

劉懋煒字紹輝鉛山人康熙鄉舉山西曲沃知縣有惠政教士不倦嘗爲洙泗言仁錄進書院生徒相講解洎歸曲沃人祀之

縣志

揭延齡字宏年永豐人康熙鄉舉武鄉知縣武鄉歲屢

早舊令不以聞延齡至齋宿禱雨陳牒乞賑計口授粟

吏不能蠹以勞卒祀名宦祠

府志

周之旦字遜膚貴溪人康熙鄉舉山東樂安知縣值久旱之旦禱烈日中甘霖立沛民咸喜以爲隨車雨也縣西北田苦磽之旦度地決渠資引灌以興水利治獄以誠蝗起不入境未久疾卒民記其遺政磨石勒之

府志

余清字青子上饒人康熙鄉舉崇尚理學從遊者多知名時廣信初定民氣未復歲屢苦歉清陳言巡撫乞免額徵巡撫重其人爲奏行焉

府志

周元字孟祥上饒人任雲南騰越副將吳三桂叛署元僞總兵不就走永昌時大兵至蜀元爲說永昌僞將軍田進學僞總兵李鍾秀反正鍾秀舉兵北勝元與進

學舉兵永昌恢復順甯府雲龍州既而賊大至眾寡不

敵元被執遂遇害

安志

祝邦仰字爾瞻鉛山人貢生耿精忠變於閩賊黨迫之不從與胡守恕同餓死古佛嶺守恕字心如邦仰同邑

人

府志

張涵弋陽人諸生有才武耿精忠變涵率鄉兵禦境上相持暮年遇賊大戰力不支被禽不屈賊使言其侶伴涵唾其面曰爾負國恩我自倡義恨不能斷爾頭何問同仇乎與興安典史魏朝連同被害

府志

江旣入字順道貴溪人性介直不苟淡於榮利嘗負母避亂鄰邑山中值大饑旣入爲糜粥奉母自食草具寇亦聞其篤行見之不忍害也以明經授瑞州府學訓導

薦知江南黟縣黟地瘠薄而民健訟既入盡釐姦弊久

之訟息民歌思之

府志

蘇春字倫五上饒人其先世閩人春幼工詩善書入都
遊尚書王士正之門所業益進嘗爲詠獫詩士正嘆爲
仙才諸徵士多與交所作飢鳳集十六卷蕭山毛奇齡
序之試京兆被放飄然歸徜徉山水間

府志

余淳

一作勃

字應川上饒人貢生博學富文不嗜榮利築

古柏軒藝花自娛

府志

汪巖字而凝弋陽人諸生敦品勤學時稱名宿聞藩變

卹舍荒墟巖猶絃誦不輟

府志

周十三上饒人康熙十五年

大兵征耿精忠復廣信

十三偕從子五三爲賊騎所獲叱引路搜尋婦女十三

不從賊怒割股肉炙而噉之叔姪相語曰甯死無陷千
百人賊益怒刳肉盡而死同時陳登雲弋陽人亦罵賊

死

府志

孫宏品上饒人勇力聞鄉里康熙閒賊江機焚掠邨落
宏品爲賊所縛脅之不從挫之不屈一日無雲而雷羣
賊驚駭宏品曰天心厭亂不改行將誅殛矣賊大怒以
刀刺其頰罵聲不絕而死

府志

周毓華字光仲上饒人父結如遭亂客死德興槩葬馬
墩洲毓華尚幼比長往收父骨封樹莫辨撫心泣血默
禱之神遇老人指示獲父骸以歸知府曹鼎望同知侯
七乘推官黎士宏爲詩表之

府志

周鎬字武遷上饒人母程守節撫孤鎬以孝著聞變起

賊江機獲鎬將害之詰姓名知其爲孝子也釋之去事
平知府大書母節子孝旌之子浩庠生孝友有家法能
卹患難里中有鬻妻者力止之而予之金

府志

徐應秋字次夏上饒人貢生崇仁訓導家貧力學事親
至孝嘗刲股以療疾耿精忠叛廣信警挈家避亂遭寇
劫於途應秋泣曰行李不敢靳乞還先世繪像寇感其
孝併還之洎官崇仁以孝弟教士會崇仁知縣卒於官
應秋代縣事政簡刑清上官異之欲薦膺民社應秋辭
而止

縣志

徐維藩字介英上饒人食貧有節行事繼母以孝聞閩
賊焚掠龍會邨居人皆竄維藩負母挈妻子冒風雨以
行賊追甚急維藩棄妻子負母踰山走妻子在後亦卒

無恙人以爲孝感

縣志

張暘字蜚谷永豐人諸生性孝友遭時亂離父年八十負之行夜出晝伏見者歎息再避寇入山暘病篤賊入有識暘者不忍犯子延祀字松年侍父母攜弱弟避賊山中父卒延祀日夜號泣賊怖以斧鎖不懼乃釋之

府志

志

縣

徐達禮字德祖永豐人明進士際旦孫事母孝孺慕終身母歿廬墓爲賊所掠脅之不屈被創死

府志

劉宏仁字常乙永豐人諸生幼與從父先甲同爲寇勢寇將殺先甲宏仁請代死寇並舍焉父先甲病篤宏仁割股療之

府志

尹介字惠人鉛山人康熙閒江楊蘇呂四姓變作介與

父同桎於賊賊日索金加鞭扑介故私謂父家藏金
曷不歸發以獻賊聞喜之任留一爲質俟獻金至盡釋
之介覲父無歸意厲聲曰金故父埋兒何處發之賊於是
釋其父既釋金不至賊以介紹己屢欲磔之賊黨有
感其孝者力爲請得不死

府志

胡良弼字國安弋陽人年十五奉親避兵聞父歿哀毀
骨立行乞治喪具復負寡母避寇興安爲童子師以養
母母亦歿賃山而厝築廬墓旁居三年課讀以償地直
撫弟極友愛白首同居

府志

俞巒字君輿永豐人康熙閒歲貢孝友端方淹貫經史
尤精性理著求知錄子之溥孫應槐皆鄉舉學行能世

其家

縣志

邵啟鼎字以輝貴溪人有從子爲賊所掠啟鼎以己子

求代賊感其義兩釋之

縣志

劉驥乘貴溪人性篤孝聞變作驥乘與繼母出走遇賊

相失奔走號泣見者哀之尋至江甯始奉以歸

府志

趙繼瑞上饒人遇物利濟閩賊至令爲向導繼瑞故迂

道行而陰遣同伴馳告各邨獲全甚眾

府志

劉有芳弋陽人諸生康熙中武弁柯昇叛偏郡守高夢

說奔有芳家有芳集鄉民輾轉護之往饒州徵兵昇迫

夢說不及禽有芳還郡苦毒備至傾其家乃已子諸生

景寬視父受榜掠慘慟而死

縣志

周鳳儀字覽輝貴溪人潛心理學隱於周洋著述甚富

康熙甲寅聞變將作語其家人賊當至吾將奔窮谷中

絕粒完素志既而如其言往視之顏如生後二日寇至

縣志

汪士鴻字晦埜貴溪人敦行勵節家貧無隔宿儲勿以介意築秋柳堂以詩酒自娛

縣志

方文舊名文章字名卿鉛山人諸生忠直有勇略江機楊一豹之亂賊巢當郡境鉛山當其衝文率鄉兵破賊於流頭門斬數百級獲偽將陳虎等扼湖坊木城中絕賊隘境賴以甯事平以功授新喻把總辭不受

籌信錄

蔣光龍字功伯鉛山人偉貌多力嗜讀書巡撫聞其才置軍中領驍騎校遂廢舉業從討逆藩戰屢捷軍事解乞歸結廬章門詩酒自娛

府志

龔奇字挺臣貴溪人福建千總從征海上連克南日平

海湄洲從崇武塗諸島直抵金門廈門提督萬正色上其功升署副將澎湖三十六島稱險隘賊眾踞之奇從大帥施琅犁其巢復從下臺灣以功加十二等復加十九等授左都督給騎都尉世職仍紀餘功四次授山西平垣營遊擊卒於官子承祖襲

府志

李惟灝字孟水廣豐人事母盡孝母年九十一卒惟灝哀毀廬墓情感路人知縣吳國用書額旌之

府志

劉俊迪字明侯廣豐人歲貢生襁褓時父客死俊迪既長度山越水求父骸不得朝夕悲號不能自已讀書淹

貫經史遊其門者多知名

府志

徐純字永輝貴溪人副貢生工詩同歲生李紱文章雄視一時獨契重純謁選官四川嘉定州判改東鄉教諭

府志

楊人傑字達夫鉛山人孝子聖思孫雍正鄉舉官樂平教諭以賢能稱士服其教升浙江泰順知縣權知瑞安時大旱米值涌貴市僧倡爲小斛民益苦不得食人傑廉知其事殞官量行之民大悅建羅陽書院析僧寺田百畝歲收粟給生徒充鄉試同考得士皆有名

府志

徐兆鏐

一作兆鏐

字發剛玉山人拔貢生以教習官甘肅成

縣知縣乞歸不出廣信知府秦勇均聞兆鏐賢過玉山訪之或謂在縣門外矮屋中勇均造其室劇談終日從者餒甚兆鏐不能具餐勇均亦自忘其飢人兩賢之

府志

高爲阜字守邨鉛山人雍正鄉舉雲南平彝知縣歷遷劔州知府姚安知府講求水利引老君山水溉田民食

其利又嘗丈量鵝雅場地酋夷拜舞競言從此百年無事為阜高明俊偉脫略凡近生平尤篤於學工書有盛

名府志

姚聯字及三玉山人諸生性穎敏讀書一目十行郡守陳世增重建玉虹橋各立名題石姚以迴文體為聯語世增奇賞之巡撫常安將以博學鴻詞薦會有母憂不

果府志

鄭長慶字發祥貴溪人雍正鄉舉初由副榜貢生

廷試入高等官都昌教諭未赴時居省城文章與李紱齊

名紱通顯薦舉長慶博學鴻詞

府志

李一培字必佑興安人雍正鄉舉穎敏篤學於書無所

不窺晚年寄情詩酒一試春官遂不復出截取知縣不

就人多其高曠

府志

江皋字鳴九貴溪人父進德老於諸生有潛德皋雍正進士官吏部主事累擢郎中轉御史充鄉會試同考官奉使河南會總督王士俊讞修鳳鳴獄時萊陽修中吉訴鳳鳴等大逆自號小齊桓小管晏謀不軌株連修景鳳等幾成大獄皋虛公質訊悉出冤濫能聲大著嘗上疏請嚴越次題升以清銓政時稱其知體

府志

周銳字德輝貴溪人選拔貢生廣東大埔知縣大埔山縣田少仰食潮米而潮人方禁米出洋並遏羅銳詣郡陳其故復條七事上之甫得請而奸人肆蜚語指爲牟利銳褫官對簿事得白復補惠來建議寬漁禁詞氣慷慨大府重之調臨高講學東郊茉莉軒軒故宋胡澹庵

寓地邑人戴定實從受春秋處也未幾兼攝澄邁臨高
民困鹽課澄邁民苦催科冊籍無主名胥吏得肆影射
銳次第釐正之會遭父喪以毀卒

府志

黃炎字繼用貴溪人雍正鄉舉幼有奇士之譽生平殫
心史學論古有特識嘗纂貴溪縣志

府志

蔡兆圻字平之貴溪人初貢太學同年生有宗人居要
津者願爲之介通名字兆圻鄙之勿與交既登鄉舉應
禮部試不第遂歸主講象山書院剖析名理窮元臻勝
所居在象山之麓學者稱象麓先生

府志

王學遜字士敏上饒人少孤育於兄事之加敬性慷慨
好施與歲饑與同縣程德基周有漢等發積穀平糶濟
人子勲進士始興知縣奉父之官學遜每以惠愛助其

子始興民感之學遜卒哭泣者不絕

府志
縣志

吳文祥字明試玉山人諸生與弟文蔚皆以孝友稱父
士登客杭州娶妾生三子文祥文蔚奉母楊家居更代
之杭省父厯三十年無缺後士登歿文祥哀毀卒文蔚
撫諸幼弟暨兄子恩義周摯文蔚子瑛幼弟天慶並登

鄉薦

府志

蔣堅字非磷鉛山人家貧負粟養母七歲隨從祖遊會
城法雲堂見捕卒在廡下言某寺僧被殺不得主名堅
私謂從祖殺人者座上老僧也其面溫而栗停聲陰顧
者三矣捕聞其語察之以爲然率僧去一訊而服及壯
精法家言幕遊山右代州有大獄囚纍纍牘可隱人撫
軍檄苛嵐知州往治聘堅以行獄具殺七人釋無辜者

百八十人臨汾知縣縱吏暴征民變棄家登山巡撫檄
澤州知州佟某往撫亦聘堅同行至則山上人如蟻螻
張旗樹兵堅乃手令箭先行環山呼曰撫軍知爾等良
也爲姦胥偏反特遣佟使君來活汝宜各甯爾家有目
者視此箭山上人噤聲稍稍下堅導餘騎入縣告佟使
榜犯法吏流血民懽噪拜謝案堵如故次日詣省撫軍
喜親炙鹿尾啖之會堅歸佟以官逋繫獄堅聞奮然起
過其家撫慰之再走澤州視佟佟在獄愁不欲食堅至
爲進一飯卒籌畫以償其逋出佟於獄其行事多類此
年七十一卒子士銓自有傳

府志

楊富崙字崇宏鉛山人乾隆進士平江知縣縣濱大江
多水患富崙築隄備之復酌水次建官倉納糧者無病

輸挽泊去官民遮留泣下

府志

陳仁字統兼弋陽人乾隆丙辰鄉舉第一家貧性嗜學幼時父授書輒懷而樵得薪則熟所授書乃歸旣壯學問淹博文采斐然會開博學鴻詞科膺徵辟者先試於巡撫仁入高等旣而自以母老辭徵後登賢書會試入明通榜選知縣不就歸孫思讓官邢臺知縣

縣志

李仲良字漢侯玉山人乾隆進士廣西平南知縣邑中貧家鬻田於人賦籍未除輒苦不能自脫仲良悉其弊許陳牒更定貧民感頌鑿古雍難以利舟楫建武成書院以課士纂輯縣志以備文獻十年俸滿調知天保引疾歸子必泰篤學著行能爲詩

平南縣志
府志

程巖字巨山鉛山人乾隆進士改庶吉士授檢討出爲

陝西正考官視學廣東肇高諸郡時廣東兩學政各主
五府一州西路文學遙東路巖曰勝朝邱海倫湛諸公
皆出嶺南今何遽無人患無以振興之耳擇士之穎異
者誨之文治大興三年調視廣韶諸郡巖請兩督學合
併爲一卽授巖全省學政校士一如前時粵人大悅稱
學政者皆曰前惠後程惠者江南惠士奇也擢順天府
尹遷吏部右侍郎督學順天進禮部左侍郎乞養歸子
爲琳舉人官福建知縣

府志
縣志

邱宏謀字穀貽玉山人以歲貢生官南豐訓導高致絕
俗同官某妄議鄉賢程山僉王私毀其祠宏謀曰程山
之學聞於天下祀鄉賢七十五年矣何可議乎力辯雪
之年老乞歸諸生爲立教思碑

府志

王勳字熙明上饒人乾隆進士官廣東始興知縣邑有險灘石林立舟觸輒破勳熾火鑿石遂爲夷坦人呼爲王公灘父憂歸服闋補保康署竹溪皆有善政母老辭官歸養子躬正諸生以孝稱

府志
縣志

周家炎字仲溫廣豐人乾隆進士陝西郿縣知縣西安同鳳三府地號陸海與甘肅接壤時值用兵供張不絕民困於役家炎爲汰其半及卒郿人立遺愛碑

府志

葉書紳字憲昭廣豐人乾隆鄉舉由明通榜分發四川知縣歷權南州岳池富順所至有政聲授大竹署忠州尋調灌縣瓦刺土司訴內地民行竊殺番人上官檄書紳治其事巡防員弁報獲十數賊詢之非是乃自往緝之見高崖有煙起密掩之獲兩賊蓋山谷閒爲賊守賊

者書紳故不發賊而伏兵於側以俟之夜半賊果至盡獲之乃釋無辜者以真賊交土司上官廉其能命運枵木入都坐事落職發四川軍營效力檄理軍需會乏鐵令往大竹購買大竹人素德書紳爭採治挽送溢額二十萬以勞復原官隨征金川赴蘢耳章谷吉地諸行營參預機務既克捷敘功一等尋赴西路營復以功授重慶江北同知署龍安知府再隨將軍率兵剿三暗書紳獻計偽撫中暗而密諭上下二暗以搗之二暗降乘閒獲諸賊曰番眾遂定擢雅州知府兼權建昌兵備道從平甘肅回運臺灣軍米累功進廣西蒼梧鹽法道權按察使檄赴南甯護安南國王阮光平入關事竣卒於梧

州府志

徐曇字雲璣廣豐人乾隆進士祁門知縣年餘乞病歸
再起循例坐補原缺其先莅祁也獄無死囚再至決一
囚囚大哭曰公不歸囚不死囚已論死而公始至豈非
命乎然猶得見公死且甘其見信於民類此祁門在萬
山中山水由閫門下怪石當道激之愈厲歲覆舟不可
勝計唐時塞門如斗大潛其水從小港出勢遂緩後土
人惑形家言復開故道爲行旅患曇排眾惑復塞之商
民交頌未幾卒於官喪歸執紼者數千人立祠祀之府志

志

縣

董醇字見三貴溪人乾隆進士貴州仁懷知縣民苗雜
處俗號獷悍醇之官宣講

聖諭務以德化有士將興訟聽講心動自碎其狀嘗判爭田獄

核兩造卷其僞者甲子不符指之無可辯積獄數十年
一語而決民呼爲董青天歲侵教民采蔴爲粉民賴以
活稱董公糧厯權婺川桐梓皆有聲舉卓異擢石阡知
府明決無滯囹圄皆空調署思南思南地匪號五虎吏
莫能捕醇授意幹役使僞與五虎交盡得其虛實乘醉
縛之寘於法四境肅然尋護理糧驛道乞歸送行者萬
人醇在黔久通苗語嘗著書譯之名苗話又嘗運鉛入
都爲書曰鉛差事宜仕黔者競取錄之

縣志

蔣士銓字心餘鉛山人生而穎異四歲母鍾授書卽已
成誦從父遊齊魯燕趙閒縛馬背上過太行就讀鳳臺
王氏藏書而歸旣補縣學生督學金德瑛奇賞之目爲
孤鳳凰與楊垕汪軻趙由儀稱江西四才子乾隆丁丑

成進士改庶吉士授編修歷充

武英殿續文獻通考館纂修順天鄉試同考尋乞終養奉
母南旋爲歸舟安穩圖見志喬江浙久之歸南昌築藏
園以居士銓服官京師才名藉甚裘曰修器之以士銓
與彭元瑞並薦士銓歸元瑞獲

召見

上詢士銓安在元瑞以母老乞歸對

上賜元瑞詩有江右兩名士句士銓旣終養入都供職旋以風
痺乞歸生平抱負志節與人交有肝膽工詩闡幽發微
言無虛響與錢塘袁枚陽湖趙翼並有名海內高麗使
臣嘗餉墨四笏求其樂府以誇榮東國卒之夕無雲而
震者三其生時亦然人尤異焉子七知廉知節知讓最

知名

府志

劉梓字樹嘉廣豐人乾隆鄉舉高安教諭以憂歸起補臨川訓導從之游者多取上第既卒生徒會葬者以千

計

府志

邱日榮字向宸宏謀孫乾隆進士方出闕聞祖疾亟星夜馳歸越三年補

殿試改庶吉士分習 國書散館授戶部主事尋遷刑部轉御史權工科給事中巡視天津濟甯漕務力糾積弊有裨時政再權刑科給事中稽查祿米倉京察一等卒於官

府志

蔣玘字比玉廣豐人乾隆鄉舉雲南蒙自知縣蒙自故土漢雜居漢大姓輒占土番地玘下車悉返之舊例官

中鬻鹽勛值錢百六十貧民多食淡地產銅廠吏重其
權而蝕餘銅爲利玼至爲減鹽價銅亦如其輕重給之
值民俗相慶旋以憂歸縣人思其德建廉明坊築所歌
詠爲興頌集

府志

祝波字映璜貴溪人乾隆鄉舉家素貧不能購書借鈔
積數千卷工詩古文辭名噪一時累上春官不第謁選
得知縣改教官歸

縣志

璩咏字鵬山貴溪人貢生官南城兵馬司正指揮尋兼
中城東城擢戶部主事監視京師賑濟吏絕侵漁貧民
得飽食擢本部員外郎卒於官

府志

劉毓秀字蒼成上饒人乾隆鄉舉歷官陝西藍田澄城
中部洛川知縣攝鄜州所至有廉能聲時方用兵毓秀

治供張軍贍民安四境不擾判教匪獄釋株累數百人
五充鄉試同考官得士爲關中最坐事左遷江陰丞卒

縣志

熊枚字存甫鉛山人乾隆進士刑部主事充順天鄉試
同考官擢員外郎出爲甘肅平涼知府以憂去官服闋
改河南汝甯知府再以母憂歸改補直隸順德薙莠蒔
良寬猛交濟所至輒有聲累遷江蘇按察使蘇俗浮佻
好拳勇習泅水事三郎神因報賽以作橫枚下車繩諸
不逞者宿習頓革累擢雲南布政使調安徽遷刑部右
侍郎轉左侍郎權直隸總督會水災上災賑七事略言
恤士駐軍規畫精密擢都察院左都御史舉循吏五劾
不職者三

賜紫禁城騎馬充會試正總裁再權直隸總督捕蝗景霸二州

歷十四晝夜不懈調刑兵工三部尚書復權直隸總督再調左都御史兼理三庫事枚歷官中外累被劾奏

上鑒其誠左遷輒起會以順天府丞充鄉試提調官坐進父卷

遲延干吏議以五品銜休致子埤掌湖廣道監察御史

孫常鐔自有傳曾孫存瀚獻縣知縣屢拒賊有戰功城

破殉節贈太僕卿入昭忠祠予雲騎尉世職本傳府志

蔡興仁字培元上饒人乾隆鄉舉文行並懋鉛山蔣士

銓爲定其所著書府志

程嶠字仁山鉛山人乾隆進士廣西靈川知縣調平南

舊事僉民爲里長輒以催逋毀家嶠除之以役催賦民

困獲甦未幾歸講學於懷玉山嶠故宿學後進多所成

就府志

汪霑字潤青鉛山人乾隆鄉舉嗜古好學著臆言一卷

蔣士銓稱其格物窮理與聖經相輔

府志

繆光黻字黼璜弋陽人乾隆鄉舉官四川知縣攝天全州權鄆縣潔清自矢興學勸農嘗葺子雲亭存先賢遺蹟再權大足鄰境賊起光黻練鄉兵自守寇不敢犯羽書旁午徭役繁興上書達當事請減苛費民無重累以父憂解官士民赴軍門泣留者甚眾終制選知貴州開州課士卹民如在川時以運鉛入都道卒

府志

陳思讓字海墟弋陽人拔貢生由教官薦擢直隸定興令定興當孔道差務煩重胥役恣爲奸思讓至稽其浮濫力予撙節吏不敢盡爲政務簡易嘗從一騎走邨落

中進父老子弟講孝悌息訟獄聚而觀者藹然如家人

後調邢臺邢臺人亦頌之

府志

陳瑞圖字東壁弋陽人乾隆鄉舉河南臨漳知縣新學
校課諸生鄰境亦集丁憂歸起補四川樂至縣築江家
堰蓄水灌田民甚德之獄無囚者幾一載尋擢劍州改
威遠所至有聲

府志

吳浩字孟深玉山人乾隆鄉舉學書於梁同書學詩於
袁枚尤喜作畫十上春官不第乃就職官龍泉教諭改
豐城未赴截取知縣未選而卒

府志

徐悅鏐字品稀廣豐人博學工古文辭乾隆鄉舉大挑
發直隸以知縣用甫抵省會大吏命爲禱雨文援筆立
就詞旨剴惻權知沙河有惠政再權廣平得士民心泊

去官民不忍別曰真我父母以其語製堂額頌焉補贊

皇以病卒官

府志

劉毓祺字啟繁上饒人乾隆鄉舉官彭澤訓導士服其教罷官歸爲學益苦筆飄屢空衍如也

府志

余基字式恢上饒人乾隆鄉舉績學工文以親老絕意仕進授學於鄉人服其教稱愚齋先生

府志

劉力夫鉛山人海豐令紹汜子父以罪遣戍烏魯木齊力夫走都門乞牒出塞省親有勸止者輒泣不成聲都下稱劉孝子旣達戍所父仍強之南還令侍母及歸母已歿哀毀骨立不數月而卒

府志

李煒字廷光興安人質魯志學年三十餘補諸生數奇屢困場屋乾隆庚寅煒年九十有九試

萬壽恩科教諭李殿邦以名姓年齒聞榜發被放巡撫入奏
賜舉人一體會試家素貧不能赴都殿邦贈之裘帛乃成行明
年已百歲布政司上言爲請建坊旣而煒試禮部舉主
者呈其文卷

上召煒入見命內侍扶掖之毋令跪拜授國子監司業抵任
御製詩曰人瑞期頤儘有云春闈應試未曾聞三場竟得全文
字一命應教獎茲勤雅化育才欣壽世宏恩錫類祝慈
雲端知欲笑胡安定年詔會昌最出羣時并

賜表裏煒自念非李教諭不及此作書貽之人尤多煒之不忘

本云

府志

鄭潛字景陶上饒人貢生里多虎患潛爲文籲有司捕
之詞旨斐惻時稱爲仁人之言

府志

曾子誠弋陽人早歲喪母哀泣無時請廬墓父不許洎父卒傍冢編茅獨居三年從子輝歲貢生並有孝行父構疾醫教之嘗糞味苦可生輝嘗之苦以告醫予一方父果愈及父歿亦廬墓三年同縣葉新興安楊永譽皆爲父疾嘗糞並著稱鄉黨

府志

蔣謙字守躬廣豐人乾隆閒歲貢生殫精經史獨標元解生平好遊覽足迹半天下所至輒有歌詠

府志

王以仁字元長玉山人選拔貢生初試於督學羣士盛衣冠往以仁獨布素旣貢成均有欲爲之地者拂衣而歸乾隆癸酉歲饑餓孳枕藉以仁設廠振之費白金數千賴以活者二千餘人或欲聞於有司以仁曰義應爾也敢以煩令長乎旋以赴試卒於途男婦哭弔者日數

十輩弟

一作兄

以義監生好施如其兄能成兄志

縣志

尹名選字衡齋玉山人優貢生由教習出爲直隸香河知縣調吳橋補涑水改知河間忤郡守解任闕歲再知蠡縣縣西南蕭家灣爲小陳河經流地高水陡長城當其衝名選治之鑿四里有奇護以堅隄水不爲患潞龍河決冒雨駐隄上督民夫捍禦衣履沾溼不少引避下令戶出夫圩置長視其勤惰以給工值隄亦復完無何蝗起制府下捕蝗法名選曰官捕不若民自捕也令納蝗一石者給百錢費私錢不及百緡而蝗盡絕丁外艱

歸尋卒

府志

胡洲字飲和鉛山人廣東連平州吏目奸民興大獄以蜚語達上官檄洲捕之洲獲其簿籍故匿之而告州長

官曰是愚民耳杖數人足矣獄遂解值歲饑發粟平糶吏緣爲奸民鬪然擊吏呵之不能止皆曰願得胡吏目一言洲至眾皆散調惠州府司獄

府志

周宏奎字武星廣豐人貢生有品詣力學不倦嘗設教福建之浦城浦城令耳其名遂相友善會主人以无妄涉訟宏奎言於令事得解主人出五百金饋之宏奎不受未幾歸教授鄉里稱大師

縣志

鄭圖南字峻飛玉山人優貢生性好學嘗之浙中師仁和趙佑卒業而歸生平循禮蹈義毫髮不苟

縣志

余嵐字魚山上饒人優貢生敦行力學耽於著述學使李鈞簡器之又能詩陳用光饒向榮皆與之酬和

縣志

呂乾字健也廣豐人選拔貢生少有異質究心性理書

孝友之風族黨化之迄今呂氏無構訟者

縣志

張家楷字魯植鉛山人諸生好學不倦輒至咯血然猶負笈游鷺湖鹿洞閒討論不衰生平敦孝友行止端重

年三十餘卒人尤惜之

府志

程炎字又山鉛山人諸生幼慧九歲能文學有原本與

府志

蔣士銓諸人爲道義交尋講學瑤坪門下士皆知名

暨之採字芳遠鉛山人歲貢生博綜羣書爲文瑰麗奇

偉葉編修一棟襄尚書曰修程侍郎嚴嘗相推服學者

稱東籬先生卒年七十二門下生來會葬冠蓋相望於

道

府志

方棣字季吉弋陽人歲貢生德化訓導學以居敬窮理

爲主教人身體力行之著書曰聖學尋源

縣志

方淇字右水上饒人武舉達濠營千總擢鎮標守備權
中軍遊擊從征林爽文駐師臺灣竹篙厝七戰皆勝將
軍常青嘉其勇檄赴北路屯兵鹽水港屢殺賊以疾歿
於軍

府志

徐之哀字恭益貴溪人諸生方正嚴毅遭親喪哀毀骨
立不從俗營佛事從子婦貧而嫠之哀亦寒士歲時必
分束脯恤之尹繼善督兩江發策問民間利弊之哀罄
其胸臆侃侃直言知縣張延福歎許之卒不敢爲之上
素工書求者輒應官中招之往則勿書也

府志

李孔地字均持廣豐人少孤與兄采樵養母年十八始
讀書勤苦刻勵工古文卓然成一家言時修府縣志延
之分校辭不赴

府志

葉瑞圖字龍文廣豐人貢生性嗜經史與弟應榴並以

文章稱

府志

徐暹字爾旦廣豐人貢生詩學少陵署所居齋曰杜窟

弟昇曇有文學通經術一時稱三徐曇自有傳

府志

俞起渭字飛熊廣豐人諸生品行端潔治經通三禮巡

撫檄往省城肄業以親老辭

縣志

王邁人字健行廣豐人貢生安貧好學年老不倦選官

東鄉訓導不就

縣志

拱鈞字寓和鉛山人諸生事寡母孝謹幼好學五經史

記性理諸書無不成誦爲文才思飄發累試不遇貢成

均都下才流咸推挹之

府志

顏天相字子品玉山人乾隆閒選拔貢生由臚錄敘直

隸州判權安南典史值苗人亂天相奉檄理軍需力疾從戎遇瘴而卒贈按察司經歷給葬祭銀廕子祿卿主

簿縣志

張張字廓仁延祀子諸生幼喪父事繼母維謹弟彌昭
弧皆異母友愛無間張嘗選官學博以繼母病不出彌
乾隆進士謁選四川安遠知縣亦以母老改南昌教授
昭與彌同榜舉人歲荒爲粥食饑者弧太學生事彌如
事父一家三世並敦內行弧孫其珙自有傳府志
秦翹翰字元良鉛山人兄弟五人翹嗣從父後中年業
小康出己所得盡析諸昆季生平見義必爲鄉里德之
年百有一神明不衰乾隆四十七年奉

胡斯隱字韻飛鉛山人工詩古文詞嘗游豫章過蔣士銓藏園士銓服其才欲薦之督學斯隱知之而逸家常絕炊忍飢高臥不求仕進經史各有著述閒泛濫於道

釋家言

府志

鄒芹兆字馨元弋陽人諸生歲饑與里父老籌賑出倉粟八百餘石縣境銅陂頭徽浙孔道阻大水難渡其父嘉所嘗建木橋以利行者水漲橋輒圯芹兆乃作石梁十數丈至今賴焉

府志

徐道登字仰斯貴溪人歲貢生所學以敬爲主燕居獨處坐立必端家貧諸弟力作夏夜或露處道登寢不施帳以分其苦

府志

俞日烜字祿昌廣豐人嘉慶進士內閣中書出爲徽州

府同知調貴陽貴陽百年無科目日烜進諸生與之講
論始有登鄉薦者歷權普安平越諸州廳所在著聲擢
都勻知府乞養歸行李蕭然人服其清德

府志

邱黎照字杖臻貴溪人嘉慶進士陝西清澗知縣既奉
檄單車服官胥吏無預知者時盛暑亢旱甘雨適至民
喜以爲隨車雨也決獄平恕不輕扑責民愛之戲謂長
官乃惜竹片在任兩年繫囹圄者二人而已縣境故多
虎狼白黎照至竟遁迹人皆異之母憂歸

府志

王樹藩字屏宇玉山人嘉慶鄉舉年十五喪父母哀毀
過於成人事祖母周竭孝養既長與弟樹葵肆力古文
辭試禮部不遇閉戶治經自傷失怙恃言及先人未嘗
不淚下

府志

徐步汀字君似貴溪人嘉慶鄉舉由大挑官廣東知縣
檄署龍門懲奸除弊士民戴之既去官縣人以詩送有
頽俗賴維持之句蓋紀實也

府志

周尚蓮字丹臺弋陽人工文辭跌宕有奇氣嘉慶進士
改庶吉士散館授知縣念親老不忍離納貲爲員外郎

遂歸

縣志

熊常鐔字象于枚之孫嘉慶進士改庶吉士散館授編
修充雲南鄉試正考官旋授廣西學政力杜浮囂士知
品節出爲榆林知府歷西安蒲州調太原躬自儉約室
無姬媵值淫雨治水築隄民戴其惠呼熊公隄累遷山
西冀甯道直隸浙江按察使廣東布政使時海上事起
林則徐銜

命入粵常鐔故與則徐同詞館講求經濟至是所見益合未幾

卒林亦去官人皆惜之

府志

蔣璜字黃玉廣豐人嘉慶鄉舉性嗜學會通朱陸之旨

不持門戶

府志

吳文健字壽彭玉山人寄籍錢塘成進士官武強知縣文健生有異稟九歲作夷齊論驚其父老比長研究經義多出心得聞蘇州段玉裁爲戴震弟子往請受業玉裁與語奇之浙江巡撫阮元開詒經精舍於西湖招集兩浙講學之士文健與焉旣官武強未三月而卒

府志

徐謙字益卿廣豐人嘉慶進士改庶吉士散館授吏部主事監督儲濟倉調海運倉皆稱職以父憂歸服闋乞養母不復出屢主鹿洞鵲湖興魯昌黎紫陽黉講席

誘掖後進以名義相切劘

府志

周如蘭字佩芬上饒人嘉慶進士改庶吉士散館以知縣用官湖北黃梅調蘄水禽治大猾民情悅服膺特薦擢湖南辰州知府沅縣奸人陳士涵聚眾作亂如蘭至從容鎮定解散其黨卒獲士涵實於法調知長沙會有獠人之變奉檄治軍需護理岳常澧道以母老乞養歸

縣志

蕭炳椿原名秉瑩字素邨玉山人嘉慶進士先嘗入貲官郎中既登第遂除驗封司郎中兼文選司歷掌稽勳驗封印出爲雲南澂江知府暮年署廣南邊郡鄰交州頗號難治炳椿平鹽筴寬權貨興義學建橋梁省科派緝匪徒百廢具舉歲餘政成民歌頌之護理糧儲道勘

金汁銀汁二河建議多開涵洞以時宣洩水無衝決患
母憂歸起援山東萊州知府平反疑獄俗安其政時海
疆戒嚴炳椿防各隘口持以鎮定四境不驚尋以事忤

上官遂乞歸

府志

鄭汝欽字鑑典廣豐人嘉慶鄉舉大挑知縣幼穎悟九
歲讀禹貢至亂於河句塾師問諸經中亂字有同訓否
汝欽以涉渭爲亂對塾師器之旣長淹貫諸經兼通子
史以大挑知縣發廣東甫三月思親乞歸教授於鄉遂
不復出弟子多賢達最著者周儻顧菊生

府志

張其珙字卞玉廣豐人嘉慶進士官主事分戶部陝西
司詩古文有盛名以病乞歸親老不復出當路致書相

招謝之而已

縣志

任之森字東華鉛山人樂善好施嘉慶間縣大義橋圯於水邑人議修之之森獨任其貲數月告成費緡錢二萬有奇有司上聞議敘鹽課司提舉纂其事入一統志

府志

蔣珂字可玉廣豐人歲貢生工詩古文與兄玘讀書白

巖山麓砥勵不忘

府志

傅宏彪字蔚文廣豐人諸生孝友謹樸工古文能詩自

稱洋山愚者

縣志

曾秀挺字麓雲鉛山人諸生家貧力學養親能得歡心

工詩意興閒澹

府志

李鑑字鏡三鉛山人諸生居縣之楓林治古文訓詞深厚詩格近中晚唐學者宗之與弟之品稱楓林二李中

歲病盲著楓林雜俎三十卷瞽者吟千五百篇

縣志

李之品字卓林鑑弟郡諸生事繼母以孝聞賦性慷慨能周人急晚歲貧病夷然不以爲意工書精篆隸刻畫

金石皆盡其妙爲詩宗法漢魏學者稱楓林先生

縣志

夏朝元貴溪人嘉慶初以武生入伍調湖北宜昌軍營

勦教匪數有功尋戰歿於陣祀昭忠祠

府志

龔肅字克敬鉛山人副榜貢生爲諸生見重於學使趙

佑後官訓導工駢詞自闢畦徑

府志

李文彪上饒人九江後營千總善火槍立標二百步發

機輒中嘉慶初從征教匪戰於鍾祥屢勝旣而賊大至

復戰左右曰賊眾我寡姑退守文彪叱之奮勇進所向

披靡卒以眾寡不敵被創死祀昭忠祠世襲雲騎尉

府志

汪曰榮貴溪人妻徐氏奉舅姑惟謹生一子而徐歿曰榮感其孝不再娶躬治甘旨事瞽父繼母能盡歡事

聞建孝義坊予九品頂戴

府志

蔣律武原名立武字繼堂士銓孫官福建縣丞孫爾準器之薦擢知縣歷權雲霄同知南靖龍溪鳳山諸邑閭俗習私鬪或數年不休律武所至率輕騎出按鄉鎮平其曲直民信畏之忤郡守罷歸以子志章貴贈資政大夫

夫

縣志

吳廷金字毓西玉山人道光進士官刑部主事有顯宦多陰事懼爲家奴知杖殺之而嫁禍於其讐眾聘視莫敢直廷金獨持正鞠問如律勢要皆斂手

皇莊莊頭多玩法其魁尤恣蝕民產無忌廷金痛繩之并

於官府志

雷維翰字光照鉛山人道光進士改庶吉士散館授編修歷充鄉會試同考官擢陝西道御史轉吏科給事中彈劾不畏權貴京師豪猾號曹七王者結黨橫行道路以目維翰奏治其罪巡視東城決獄有神解胥吏驚服出爲湖北荆宜施道乞病歸會粵寇起侍郎曾國藩檄維翰治糧糈并江閩交界團練積功加鹽運使銜

賞戴花翎尋卒

縣志

華日新字修德鉛山人道光進士改庶吉士散館授戶部主事尋補湖廣司擢廣西司員外郎陝西司郎中奉使驗海運米石敘功以道員請簡授廣西右江道時粵

寇方熾日新兼理軍儲權按察使事賊謀謀然火藥作亂獲而斬之賊遂走

賞戴花翎

加按察使銜權布政使旋擢廣西按察使爲政具有

經緯讞獄尤持平有慈悲佛母之譽擢江蘇布政使仍留廣西治報銷日新體羸弱值多事之際心力畢瘁方句稽積牘咯血不止遽卒

縣志

朱夢元字貞起先世籍涇縣以貴溪籍成道光進士改庶吉士散館授刑部主事補江蘇司擢福建司員外郎充軍機章京協修方略時軍事旁午夢元朝夕入直不敢少懈逾年授浙江道御史進鴻臚寺少卿累遷通政使司通政使權刑部右侍郎出爲山東正考官夢元起自刑曹不數年躋九列忠誠亮節進言持大體嘗上疏

請免直省積欠錢糧飭江西撫臣查核殉難士庶彙疏
旌卹於江西省城建立張文毅公專祠人皆趨之乞歸
省墓旋卒

縣志

蔣志章字恪卿鉛山人士銓曾孫道光進士改庶吉士
散館授編修充

國史館協修

文淵閣校理咸豐初以父憂歸屬軍興在籍治團練事服
闋補江南道監察御史轉兵科給事中兩充順天鄉試
同考官稱得士咸豐十一年奉

旨巡視南城時天津英警會辦團防屢矯眾議獨任勞怨旋授
廣東督糧道濱海沙田開墾升科累釀巨案志章力矯
前弊民情帖然有質成悔過者署布政使遷兩廣鹽運

使時粵匪初平商未復業裕課恤商至今稱便遭母喪解職服除赴都有

旨辦理清河賑務授浙江按察使升四川布政使擢陝西巡撫行抵沔縣值甘肅金積堡賊突圍志章兼程之任甫三日賊已大至蔓延十餘州縣省城防兵僅千餘有言宜固守待援者志章曰是示之怯也激勵將士山城迎擊檄駐陝防軍扼要截剿越一月賊窮蹙遁去關中遭寇亂流離失所北山尤甚志章定先撫後剿先賑後墾策奏請發帑

上從之於是慎選牧令散給籽種招徠開墾是歲大有流民再生以疾卒於官年五十八遺疏入

上震悼陝甘總督左宗棠復疏陳志章外和中介清風惠問實

諭賜祭葬予諡文恪志章潛心性理雖燕居不苟言笑敬慎謙

與前四川總督駱秉章前福建巡撫徐宗幹同無聞然

和刻苦自勵居家課子弟教養婚宦賴以成立戚族窮
乏推解無所吝至告貸典質以應之服官後置義田以
贍族宦轍所經布德行惠始終不倦同治十二年崇祀
陝西名宦祠士民爲立碑於潼關刻石紀功德

府志本傳

採訪事實

諸國均字韻和鉛山人貢生醇謹好學究心性理諸書
泊然無求嘗采先哲嘉言懿行手錄成帙以示子弟曰
士先立品凡讀書當求力行然不易也學者稱醇齋先

生

府志

鄭兆湘字楚水上饒人諸生淹貫羣籍尤精春秋其言

曰讀書非徒博取科第惟窮理致知省身克己方切實

用

府志

翁汝瀛字大觀鉛山人道光舉人大挑湖北知縣署黃陂以廉幹稱調署黃岡甫下車卽督紳士練義勇修城垣捐廉爲之倡賊至以有備不敗大吏聞之檄命兼護府篆時賊燄方熾往來湖北如織所過皆破獨黃州獲全乃委以辦賊授兵二千諭營官受其節制汝瀛能與士卒同甘苦故士皆效死戰輒捷咸豐四年勦賊漢口鎮大小十七戰賊幾不支明年賊大隊從他道入援汝瀛被圍躬自督戰互有勝負別賊以小舟渡漢江繞出其背眾遂潰汝瀛死之官弁士卒同死者千餘人

詔贈知府銜予世襲雲騎尉黃州人素德汝瀛請於府城建專

祠以所部陣沒之士附焉府志

方臺字蘭階上饒人道光十六年一甲二名武進士授二等侍衛出為直隸提標左營遊擊擢陝西宜君營叅將粵賊入楚奉檄調赴武昌分守賓陽門屢卻賊城陷猶督所部巷戰力竭死之

特旨諡果肅照副將例議卹予世襲雲騎尉入祀京師暨湖北

江西昭忠祠府志

王綵廣豐人農家子家甚貧父病篤不能謁醫私判股和粥以進尋愈母病其弟總踵行之亦愈總子培元事總亦如之縣官為書純孝錫類以旌府志謹案府志傳以為真西山大儒嘗取黃章割股吳祥取肝其孝思自不可沒惟事實多同今仿唐書李友傳例類記如右王德藩童士位李春榮徐天奉方朗榮吳如茂鄭孝順游衛玉王文獻周朝陞王朝徽邱素敬夏之樂並上饒

人陳有理玉山人周大賡劉士林呂應銘劉緩鄭起洪
周森謝樂善翁望興毛逢吉並廣豐人劉正任劉其漢
何偉鄧紹虞劉承熙張榮來劉廷起汪世勣江奎璧張
熾張啟瑞曾珏吳光政徐仁德祝受華顏煒均並鉛山
人汪年椿汪焜耀弋陽人蔡科元龔廷錫龔其黃永壽
張暢遠程惟泰胡兆虞江茂才並貴溪人李長茂方坤
邱雙才並
興安人

詹鍾期字信周貴溪人篤志聖賢家貧自運薪水怡然
不以爲念講學東岡家塾教人以收斂夜氣爲第一義

府志

詹聞字鶴汀貴溪人諸生力學窮經有得於易著易曉
三卷發揮易非中爻不備之義生平不求榮利日手一

編府志

謝藩字偉人弋陽人琛五世孫由國子監生考授州同
知處事善裁決人佩其議工駢詞能詩縣志

徐世鐸字大令貴溪人諸生治五經嘗著春秋族系表

周易寡過數經史歌訣

府志

周瑛字漢玉興安人諸生好讀書究心史學工古文宗

鄉先輩曾鞏

縣志

鄭再興上饒人農家子母年六十患痿痺維持調護殯

屑必親十五年無倦色人以爲難

府志

徐治上饒人國學生敦尚孝友五世同堂親見七代同

縣劉文桂黃榜並修內行鄉里稱善人皆五世同堂

府志

謹案府志載五世七世同堂者甚多省志無全采之例此三人縣志兼稱其孝友錄之

郭元緒上饒人以醫遊浙中聞母病馳歸不及視含窆

哀毀彌甚寢墓所百日三年不茹葷父卒如初姊憂其

過毀餉飯密藏肉元緒大哭卻之

府志

汪廣玉山人性至孝事母陳色養至母歿廬墓三年

藜羹芒履晨夕悲號聞者隕涕

府志

林仲舉字興周玉山人諸生林族與里中黃氏鬪有死

者父爲家長被逮將下獄仲舉以殺人自任出父於獄

讞成流陝西後遇赦回父前卒展墓悲號聞者隕涕

府志

縣志

吳泮玉山人諸生父病足母盲出入皆泮掖負三十餘

年未嘗少懈執親喪三年不入內寢年踰七十哀慕如

孺子

府志

賴汝濱玉山人九品銜母患風痺出入負之旣卒踊躄

哀號絕而復蘇者再

府志

呂文炳字虎臣廣豐人幼喪父家貧餽粥不繼或薦之

北鄉爲童子師途行遇虎乞免死以養老母虎搖尾去

府志

傅士玉字金石廣豐人篤學砥行母喪廬墓三年父卒

亦如之同縣韓之鏜紀景昉並親歿廬墓里中稱孝

府志

韓應福字元祥廣豐人世業農少喪母與父相依爲命

出事田作日十數歸視父年五十餘父始卒哀泣如孺

子邑人欽其孝舉充鄉飲賓謝曰此何如重典以農家

子濫膺之適媿我矣

府志

周耀淵廣豐人諸生至性過人入鄉闈夢父病篤卽棄

歸父已卒號哭幾殆母病咯血耀淵晝夜侍寢食皆廢

禱於神願以身代卒不起哀毀卒

府志

丁培裁鉛山人諸生天性純篤母病癰數年不愈培裁

常舐吮之得少減父患瘡手足皆痿扶持衣食並出培
栽雖有僮僕弗任也同邑爲親吮瘡者有李丹墀及王

山王長發興安鄭家森

府志

胡幼李鉛山人蚤孤天性孝友五歲母疾輒嗚咽不食
母愈乃食兄守愈聞族人起大獄羅織及之踰垣而遁
族人脅不已幼李甫十五出鳴其冤族人以賄屬吏拘
繫之被掠無完膚終不言兄所在遂病創卒

府志

楊接孫鉛山人性至孝事父朝夕不離側初婚時父適
患癰接孫侍父疾不入私室卒哀毀咯血而歿

府志

鄭尚明鄭尚發鉛山人世業農篤於天性母胡老病憚
於動履兄弟相議一出傭力供醫藥一居家侍母互相
更代浣衣滌廁無有不供母得享大年鄰里敬之醪資

使娶謂孝子不可無後也縣官旌其閭

府志

王拐子失其名鉛山人家貧事繼母孝或出乞食必擇其潔者奉母與人爭聞母聲卽止母責以杖必跪受俟

母顏霽始起邑人皆重之

府志

胡照弋陽人諸生幼締婚朱氏朱女病痺數年弗愈女父詣胡請離婚照時九歲告人曰盟不可寒豈以疾病易吾志乎父奇其言舁歸療之病竟愈照性孝友授徒養親甘旨必備兄女及笄弗能嫁鬻已產飲之或曰子之女亦笄矣詎有田可再鬻乎照曰吾女期在明年孰能懸此田爲後計邪其率性類如此

府志

饒廣颺字輝光弋陽人父病八年颺率婦侍湯藥終夜未嘗解帶婦勞瘁卒恐傷親志含悲不敢發父歿母復

得瘋疾輾轉牀蓐者十二年颺竭力奉侍家貧無生計
幼年戲學織絲俟母寢篝鐙作之易錢以養母坐是目
瞽猶每夜焚香告天祈祝母壽目忽明孝養益至母歿
哀毀骨立未數月卒

府志

艾金字艮元弋陽人諸生性方潔不苟取與母年九十
餘金訓童子以供菽水竭盡孝養母卒廬墓三年不飲
酒不苟葷遇忌日輒嗚咽不食

府志

汪錦坡弋陽人諸生父甘澍性嚴切錦坡先意承志翁
和昆弟咸能順之父患痺朝夕撫摩三十年不少懈積
勞病目逾年復明父亦尋愈一時以爲孝感先是父爲
錦坡聘吳氏女七齡而瞽吳使人告汪氏願辭昏甘澍
曰女旣議昏不幸瞽命也背之不義卒如約錦坡旣娶

女終身不置媵妾順父志也有司舉充孝廉方正以親

老固辭

府志

劉世佐字翼明弋陽人蚤歲喪父事母吳以孝聞天寒必以身溫席母卒卜地貴溪載柩往舟覆抱柩長號漂泊抵岸得無恙惟水入耳遂病聾廬墓六年卒邑人祀之忠孝祠

府志

葉春榮字我辰弋陽人有至性弱冠喪父哭三年不絕坐是病目棄舉業朝夕奉母會母疾春榮亦病猶強起侍湯藥母卒不起抱母大呼一慟而絕邑令旌之

縣志

李宏春弋陽人父歿鬻身治喪越數年主人憫其孝俾之歸年六十娶婦生子九十而卒晚歲薄有貲時以振

族黨之貧者

府志

張照弋陽人父公獻喪偶不再娶以悼亡盲其日照走
千里求醫皆罔效乃舐以舌目遂復明父歿哀毀骨立
每遇忌日必哀慟習以爲常同縣張大彬亦爲母舐目
母竟愈

府志

林振義字瑞卿貴溪人父老病轉側需人振義晝夜侍
之中褰廁踰躬自浣濯歷三年弗少怠

府志

龔祿字天錫貴溪人幼孤年十二居室火母病在牀弟
純錫方數齡祿冒火掖母出復入抱其弟肌體焦爛幸
不死逾年母卒哀毀骨立既葬攜弟露處墓側者旬日
友愛尤篤人無閒言

府志

趙霖字肅若貴溪人貢生早孤事母至行純篤母卒
喪祭盡禮既葬復遷前後廬墓六載風雨無倦容霖於

兄弟中齒最幼恂恂隨侍聽命惟謹同縣有饒以明者
事寡母孝母卒亦廬墓府志

汪光字月垣上饒人諸生究心理學每舉易之損象曰
懲之又懲窒之又窒久之可以無忿無慾嘗夜宿農家
拒奔婦移宿他所不言其故能醫好施貧者府志

王清鐸上饒人以直道著聞鄉里有忿爭者聞清鐸至
皆立解或覩婦女出游必召其父若夫告以不可邑中
非義之行皆不敢使清鐸知既卒人猶述其風範以勸
子弟府志

朱世榮字淡將玉山人諸生好義嘗興復懷玉書院費
數千金又建義倉積穀貸貧戶府志

諸焰字成琪廣豐人性和厚人樂親之偶歲荒行掠者

眾或經焰門焰揖之曰吾家頗有餘蓄願與諸君平分
之慎毋他往干罪戾掠者感愧而散邑中有穀者聞其
事爭減價出糶四境舉安

安志

祝新畝字富田鉛山人嘗修西坑路五十里鄉人稱長

者

府志

周嘉謨貴溪人國子監生年未冠母吳憫溺嬰者使嘉
謨雇貧家婦乳之嘉謨承母意行之四十餘年毀家勿
惜也巡撫上其事奉

旨建坊

府志

舒德光貴溪人業操舟奉母甚謹母歿哀毀盡禮既卜
葬時負篷宿墓側雨雪不輟奉母杖於舟中朝夕上食

如生時

府志

說宋自王綵至舒德光三十
九人時代無攷臚其行事類列之

顧菊生字師陶廣豐人幼好讀名臣奏疏尤嗜呂子全書道光鄉舉大挑陝西知縣未就入貲改福建同知再改戶部員外郎乞假歸會寇犯廣豐畫策助知縣守城賊退論功以知府用復應禮部試成進士仍官戶部員外郎擢郎中出隸浙江巡撫左宗棠軍浙省肅清宗棠令赴甯紹籌核減賦旋奏以道員留浙補用權紹興知府除蠹吏決疑獄民頌曰顧青天官衙有井曰懷清菊生嘗偕賓佐游其上自云願居心無媿此水人亦謂顧公無媿此言也未幾權金衢嚴道時三郡邨落邱墟旣之官清釐荒田手自條定章程以上行省如其議民不失業流離漸復菊生洞達政體不爲矯激律已至嚴而御眾寬浙中郡縣減賦之舉出自菊生者歷久無弊紹

興士民尤戴其德以勞卒於官同官爲舉其喪入祀鄉

賢祠暨浙江名宦祠

府志縣志

熊存瀚字夢渤鉛山人道光鄉舉揀發直隸知縣歷署寶坻良鄉武清所至有聲補清河鄰境盜起存瀚率鄉民爲陳禍福復募勇守要害賊不敢犯奉檄防河加運同銜調獻縣練士築城爲守備計擒首張總愚竄擾畿南遂圍獻存瀚守南城當賊衝矢石雨下賊稍卻會別賊假官軍旗幟給東門入城遂陷存瀚率兵民巷戰被重傷力竭死之

詔贈太僕卿予世職建立專祠僕裘槐等同殉併祀焉

府志忠

義錄

陳肖儀字琴泉弋陽人湖北天門縣丞以獲盜擢知縣

縣民奉土塊稱爲神其旁有泉稱爲聖水男女聚飲奔走若狂肖儀嚴禁之調知應山值蝗災下鄉巡撲宿古庵中夜夢蝗神叱之去比旦卽見野鳥數萬啄蝗盡死每禱雨隨車而至人以爲神再調鍾祥堵築潰隄不辭勞瘁加同知銜移任江陵內艱歸服闋攜第五子恩霖赴楚聞粵賊亂條陳防勦事爲大吏所許奏以知州升用通城襄陽民變奉檄戡定之誅其首釋其脅從市月遂平廣濟以徵糧辱其令眾無敢繼之者乃以委肖儀至則與紳民約一準舊額額外不妄科一錢紳民服之遂獲首犯論如律已而粵賊竄境廣濟故無城亦無兵勇肖儀報大府曰下吏力薄不能戰守惟死城池以報國耳賊將至整冠裳北向哭拜挺刃端坐恩霖侍側濫

筆大書撈持天地惟忠孝報答君親望子孫十四字於
几上孫字猶未竟賊擁入卽自刎賊奪刃勸之輒怒罵
殺恩霖脅之罵益烈賊怒裂其尸欲投諸火驟聞霹靂
聲乃不敢焚賊退邑士民覓遺骸惟首未獲見羣鴉哀
鳴沙際迹之果得其首目炯炯如生事

聞賜卹如三品例世襲雲騎尉越二年巡撫胡林翼奏建專祠

府志

郭守謙字小山上饒人諸生與同學楊敬資曾守誠募
勇士曰廣義軍克復金谿時有三秀才之稱以功敘訓
導咸豐六年江西學政廉兆綸檄守謙從前皖南道石
景芬赴勦撫州尋以甯都賊竄廣信復檄守謙等迎擊
之自貴溪移營敗賊張家橋督勇追擊三戰三勝賊登

高窺其軍少無繼復磨至守謙遂遇害先是道員羅澤南勦賊廣信守謙糾同志應之其後殉節遂附澤南祠

並予世職

府志忠義錄

謝廷英弋陽人宋文節公枋得裔襲奉祀生同治三年賊犯弋陽眾議合力禦之方會於文節祠而賊已至眾驚散獨廷英偕其同族公善端坐不動賊脅之降叱曰堂上所祀吾祖也吾忠臣後豈降賊邪賊殺之並殺公

善

府志忠義錄

璩清連貴溪人監生咸豐七年賊至清連負祖母伏叢莽中賊搜山清連被執賊將殺之其子裕貞趨救乞以身代賊許之擄裕貞去越日賊再至清連以祖母故不忍走卒被殺後十餘日裕貞脫歸始殮焉

府志忠義錄

江西通志卷一百五十九